



全國經濟委員會水利處印贈

# 河防一覽

葉恭綽題





運 航



力 水



洪 防



溉 灌



水 給

上海图书馆藏书




A541 212 0005 7377B

~~163488~~

# 河防一覽

三

明 潘季馴



第一輯

第四種

據明萬曆刊本及清乾隆刊本參校

封面題簽：葉舉虎先生

中華民國二十五年五月出版

中國水利工程學會藏版

校對者 徐 硯 農

句讀者 汪 胡 楨

河防一覽卷之十一

河臣潘季馴著

南旺分記主事王元命  
濟甯兵河副使曹時聘 杉訂

上海市歷史文獻圖書館藏

【奏疏】

添設管河官員疏

臣潘季馴謹題。為查議管河官員。以裨修防事。據河南管河道副使陳九仞呈稱。蒙臣閱視河隄。勘得府州縣管河官員。有地方廣遠。一官難以管攝者。有河防險要。未經額設專官者。有陞遷事故。見今員缺待銓者。牌仰本道會同酌議。某處應該添補。某處應該更調。就便遴選賢能。堪任官員。具由通詳。以憑會題。蒙此行據開封府議呈前來。該本道會同守巡大梁道參政王來賢。僉事王九儀。議得黃河經行開封府屬。歧分兩岸。延袤千里。南岸如小院村瓦子坡黃煉集閻家寨劉獸醫口陶家店張家灣時和驛槐疙疸王家樓埽頭普家營等處。繫關省會藩封重地。北岸如甄家莊郭家潭脾沙堤于家店中藥城荊隆口陳橋貫臺馬家口陳留寨銅瓦廂張村集煉城口榮花樹三家莊等處。逼鄰漕河。重于運道。先年屢被衝決。今雖築隄完固。但管河同知止有一員。平時修守已難周遍。若遇河漲風濤。兩岸相隔。顧此失彼。何以克濟。應照淮



089175

安兗州兩府各有管河同知二員事例。添設一員。駐劄北岸荆隆口。及查河北舊有演武亭一處。乃滎澤等四縣聯界之區。盜賊出沒。水陸爲害。先年曾設官兵防禦。今已廢格。時有警虞。似當以添設管河同知。仍兼捕務。往來督視。以靖地方。庶爲兩便。及查祥符縣河工浩繁。道里遼遠。額設主簿一員。委難卒辦。相應添設主簿一員。以分責任。滎澤縣居黃河上流。向屬縣丞兼管。今改沁水與黃合流。盡由該縣出口。二河併湧。兩岸俱險。乃縣丞督糧。竟運往返不暇。有誤河防。相應卽置主簿一員。以專責成。蘭陽縣管河主簿王佩儀。封縣管河主簿。余純華。俱已陞任。員缺未補。以上四縣。應添應補官員。若候銓選。未免耽延時日。且初任未諳。恐致墮誤河工。今據該府推舉各道遴擇。查有開封府經歷姚學孔。才幹優裕。操守謹嚴。督工克効勞蹟。防禦已竭心力。宣武衛經歷劉汝行。小心謹慎。幹理條達。河工夙夜多勞。廠務纖毫無染。俱蒙院科會薦。內應選擇一員。加以帶銜州判官祥符縣添設主簿河務。原任滎澤縣典史。今陸光山縣牛山巡檢高榮魁。向委隄工。克勤厥事。雖經遷轉。而修防皆屬經手。相應陞補該縣管河主簿。原任通許縣縣丞。今陞陝西葭州判官呂文。承委修築。則竭力經營。居官操持。則恪守清潔。今雖報陞。尙未離任。似宜改留。仍以帶銜州判管理蘭陽縣主簿河務。原任陳州吏目。今陞甘泉縣主簿李克己。才力俱壯。心行亦純。若畀胼胝之任。必收底績之功。相應改留。頂補儀封縣管

河主簿。其中牟縣管河。該府議欲添官。以邑小民疲。既有縣丞兼理。似應照舊。再照黃河南岸盜賊繁興。舊委巡河指揮二員。徒擁虛名。無益河防。且擾害莊民。需騙船戶。今既添設同知主簿。駐守河濱。巡緝事宜。應歸河官約束督理。原委武職。革撤回衛。庶分理得人。河防捕務均有攸賴。等因。呈詳到臣。據此。近該臣前往河南地方。躬率管河道副使陳九仞。并分守道參政王來賢。分巡道僉事王九儀。開歸二府知府王見賓。陳禔。及各該州縣管河等官。沿河踏勘。每至本官該管地方。備將本處要害。細加詢問。做過工程。細加閱視。中間隄壩堅好。應答如流者。固有。而苟且虛應。蒙昧無知者亦多。揆厥所由。有因道里遙遠。而奔走不及者。有因官係兼攝。而志意不專者。有因河官懸缺。暫委代署者。隨行該道查議去後。今據前因。該臣曾同巡撫河南右副都御史衷貞吉。巡按河南監察御史王世揚。看得河南實運道上流。關係甚重。而用人實治河首務。毗藉甚殷。經理於上者。固爲鉅艱。而委任於下者。尤爲喫緊。頃者節奉聖旨。自今推選委用。務在得人。欽此。臣等仰見我皇上留神河務。洞燭治原矣。臣等不勝感服。今據各道議將開封府比照淮安兗州二府事例。添設同知一員。駐劄荊隆口地方。帶管巡捕事務。蓋荊隆口逼近長東二縣。去年黃河從此決入。長東幾溺。若有府官駐劄。必能保守。衛河南亦衛長東二縣也。其應添設及銓補管河主簿。就將經歷姚學孔。劉汝行內定一員。加以判官職銜。分管



祥符縣河務巡檢高榮魁陞授主簿管滎澤縣河務判官呂文仍以原職帶銜改留管理蘭陽縣主簿河務主簿李克已應以原職改留頂補儀封縣管河主簿中牟縣邑小民疲河患亦少原係縣丞兼攝委應照舊其陞補各官遺下員缺聽另銓補原委巡河指揮擾民無益合革回銜一應巡河事宜歸併管河官兼管尤爲良便似應依擬伏望敕下該部再加查議如果臣等所言不謬覆請允行速賜改補以便預備來歲修防儀封蘭陽二主簿缺或於臣疏未到之前已經銓補仍恐初任未諳亦望轉改別用其開封府添設同知查無相應官員乞於鄰省查有資俸相應者就近調補勒限到任庶承委得人而河防允賴矣緣係查議管河官員以裨修防事理謹題請旨奉聖旨吏部知道該部覆奉施行

### 申明河南修守疏

臣潘季馴謹題爲申明河南修守事宜以固河防事臣竊惟黃河防禦甚難而中州爲尤難蓋河自崑崙歷關陝以至河南則伊洛渭沁諸水合焉水愈多勢愈盛而自三門七津以下地皆浮沙最易汕刷故自漢迄今東衝西決未有不始自河南者也去歲河決劉獸醫荊隆口等處勢如飛電呼吸千里上厪聖慮特遣科臣會同撫按諸臣分投督築地方始有更生之樂然先

事之防。固當預慎。善後之計。尤宜亟圖。則今日修守之事。臣之事也。臣之責也。敢不盡心力而圖之乎。臣於受事之初。惓惓申飭各該道府管河等官。及將四防二守之法。丁寧告戒。今歲幸保無虞矣。而猶慮河情地勢。目所未覩。足所未及者。固難以懸想而測度之也。復於九月初七日。自濟寧州起程。前往該省。督同管河道副使陳九仞。及郡縣掌印管河等官。將南北兩岸堤壩。逐一閱視。河患巨測。將來可憂者一。而修防喫緊。目前應舉者六。一者何。河南之委流是也。杏得河南黃河。涓滴皆由徐邳出清口。曾淮入海。舊由新集歷趙家圈蕭縣薊門出小浮橋。勢若建瓴。河南無阻梗之虞。徐邳有衝刷之利。水之道也。後因河南水患。另開一道。出小河口。本河漸淤。至嘉靖三十六年。河遂北徙。一變而爲溜溝。再變而爲濁河。又再變而爲秦溝。今則由胡佃溝梁樓溝北城鴈門石城等處。而復出濁河矣。中間經行之處。皆係民間住址。陸地較之故道。河底高出三丈有餘。漫流平地。無渠可歸。深者不過數尺。淺則尺餘耳。黃河并合汴沁諸水。萬里湍流。勢若奔馬。陡然遇淺。形如檻限。其性必怒。奔潰決裂之禍。臣恐不在徐邳。而在河南山東也。緣非運道經行之處。耳目所不及。見人遂以爲無虞。而豈知水從上源決出。運道必傷。往年黃陵岡孫家渡趙皮寨之故轍。可鑒乎。臣於萬曆六年。題爲黃河來流艱阻。後患可虞。乞恩速賜查議。以圖治安事。該工部覆行鳳陽河南山東撫按會勘。得開復故道。勞費不貲。事

體重大時勢未宜。工部覆奉欽依停止。夫開復此河。工費須以百萬計。各省俱當災歉之餘。內帑正值空乏之際。一時委難輕議。臣未敢瑣瑣陳乞。姑候年歲豐稔。民力少蘇。另行題請外。今將修防緊關事宜。條列於後。伏望敕下該部。再加查議。如果臣言不謬。覆議上請。行臣遵奉施行。河防幸甚。臣愚幸甚。謹題請旨。

計開

一查得黃河北岸。逼鄰漕河。關係甚重。弘治年間。先臣劉大夏築有長隄一道。起自曹縣界。至武陟縣詹家店止。延袤五百餘里。南岸逼近省會。藩封重地。最為要害。亦有長隄一道。起自虞城縣至滎澤縣止。兩隄延亘千有餘里。實為該省屏翰。但地鮮老土。隄皆浮沙。而河流遷改靡常。多有濱河難守者矣。今據該道逐一查覈。分爲緩急二工。開封府如儀封縣北岸。煉礮口舊隄一段。長一千五十丈。舊壩一段。長六百五十六丈。壩後水坑長二百五十丈。南岸普家營等處新舊月隄四段。共長三千一百五十五丈。開陽縣楊家莊至賈家樓舊隄一段。長一千六百丈。南岸自陳留縣界至儀封縣界舊隄一段。內有缺口二十一處。祥符縣南岸劉獸營口迤南舊隄二段。長一千二百五十丈。張家灣老壩塌斷。應築遶後月壩一段。計長三百五十丈。又自陶家店至兔伯堞自埽頭集至舊隄頭長隄二段。共長七千五百五十

六丈。又該河南撫按會同工部都給事中常居敬題奉欽依。剏築劉獸醫口遙隄一道。長三千七百丈。封邱縣北岸荆隆口中藥城于家店張家莊蕭家莊各有水衝潭窩。共長一百七十五丈。又該科撫按諸臣題准該縣荆隆口剏築遙隄一道。長二千零九十九丈。陽武縣北岸脾沙壩埽壩長三百丈。原武縣舊隄一道。分爲五段。共長二百八十九丈。滎澤縣北岸長隄一道。自朱世花大王廟至王婁店郭家潭等處。共九段。俱有潭窩。共長一千七百七十二丈八尺。歸德府考城縣北岸芝蔴莊迤東埽壩三段。共長八十九丈。李秀廠東隄決口四丈。唐家水口壩基二十一丈。水坑二十八丈。商邱縣南岸楊先口隄三十二丈。以上工程。或剏築。或加幫。或填補。皆係險要之處。亟宜興舉者也。又如儀封縣北岸榮花樹舊隄一段。長一千六百三十三丈。空泥河舊壩坍塌共三百七十丈。祥符縣北岸馬家口舊隄三段。共長一千四百七十丈。省城四面大隄一道。高下通融修理。共計六萬五千九百工。陽武縣北岸舊隄自王佑莊至脾沙壩分爲九段。共長四千零八十九丈。南岸舊隄自營家莊後至中牟縣圓墩寺止。分爲六段。共長三千三百六十四丈。原武縣南岸舊隄二段。共長五百四十四丈。中牟縣舊隄六段。共長一千四百七十丈。俱應加幫。形勢稍緩。應俟急工完日。次第興舉者也。兩工告竣。可恃防禦。但築隄不難。而覓土爲難。若非真淤老土。隨修隨壞。徒費無益。谷臣嚴行

管河道刻期幫築。加意驗探。如有墮誤。或夾雜浮沙。或奔杵不實。苟且塞責者。容將管河官參拿究治。伏乞聖裁。

一臣查得沁河發源於沁州綿山。穿太行。達濟源。至武陟縣。而與黃河合。其湍急之勢。不下黃河。兩河交併。其勢益甚。而武陟縣之蓮花池。金坎壩。最其衝射要害處也。去歲沁從此決。新鄉獲嘉一帶。俱爲魚蟹。今幸堵塞。築有埽壩矣。但係浮沙。恐難久恃。且壩內爲商民峽集之處。煙爨不下千餘。以隄爲命。關係不小。查得最險之處。僅四百三十五丈。整之以石。方爲可久。况每歲修守。費亦不貲。積之數年。與石無異。何憚而不爲耶。已行該道查估。隨守隨築。遲以三年之久。必可竣事。此隄一成。百年永賴矣。伏乞聖裁。

一臣查得河道錢糧。止是徭編。河堡夫銀。工役所恃以爲生。河防所恃以爲固者。此也。而有司視爲末務。每倦追徵。吏書乾沒。收頭侵欺。殆十五矣。向來舊例。俱係各州縣另徵另解。庶便稽查。近有議請併入條鞭者。夫條鞭之法。非爲不美。但解京錢糧。與本地方急用銀兩。儘先徵解。而待次可緩者。輒爲贅旒。此有司之常情也。若一概併入條鞭。則畸零人戶。逋負糧稍。皆作河道錢糧矣。臣請仍照舊例追徵。管河道立限催比。收至百兩以上。俱解赴開封府收貯。如遇考滿陞遷。完不及三分之二者。不准離任。庶人知警惕。而錢糧自裕矣。臣又查得

河道銀兩。節經題奉欽依。不許別項那借。今以祿糧借以驟傳。借以會銀。借以紙贖。借者不知幾萬矣。夫以本項未徵借貸。則當於已徵扣還。而久假不歸。玩愒殊甚。合無容臣嚴行管河道。備查明白。照數扣還。再有逋負。容臣參究。實於河工有裨。伏乞聖裁。

一臣惟河防在隄。而守隄在人。有隄不守。守隄無人。與無隄同矣。近該管河道副使。議令開歸懷三府。遵照工科給事中常居敬題。准事例。各於隄壩之上。每二里。修建堡房一座。僉令堡老堡夫。常川住堡。看守埽料。防護隄岸。修補坍塌。填塞窩穴。看守柳株。禁逐樵牧。三伏九秋之間。不分風雨晝夜。竭力防守。法至備矣。但終歲勞苦。雖得官給工食。糊口不敷。合無行令三府掌印官。即於近隄處所。勘刷地段。堡老每人給與六畝。堡夫五畝。以便耕種。稍助食用。其應給地畝。先儘沒官田地。如有缺少。動支曠工河銀。置買民產。仍給帖照。免其糧差。則人心樂爲之用。而隄防可久矣。伏乞聖裁。

一臣惟勵世磨鈍之術。惟在勸懲有道。而於河防最苦之事。人心尤易懈弛。先於萬曆八年四月內。該勘工給事中尹瑾。題爲河工告成。敷陳善後事宜。以圖永利事。內開定法制。以覈歲修。該工部覆議於秋冬之交。將各經管官員。分別功罪。奏請陞賞罰治。題奉欽依在卷。但此例僅行於淮徐。而河南未經題請。未敢擅行。誠爲缺典。合無容臣於秋防報竣之日。將河

南掌印管河等官一體甄別。遵例具題施行。庶人心知警。而河防不至弛墮矣。伏乞聖裁。

一河南雖非運道經行之處。而河情水性。與徐淮無異。則當以治徐淮者治之矣。先該臣於八月二十二日題爲申明修守事宜。以圖永賴事。皆爲徐淮隄防而設。內有責成長令。以一事權。蓋欲歸重於郡邑掌印官也。預定工料。以便工作。蓋欲早覈歲修工程。以便興舉也。立法增築。以固隄防。蓋欲遵例加培舊築。以固隄防也。茲三事者。皆可行之於河南者也。已經題奉明旨。臣不敢再贅。合無容臣行令河南管河官員一體遵照施行。實於河道有裨。伏乞聖裁。奉聖旨。工部知道。工部覆奉聖旨。依擬行。

### 停寢訾家營工疏

臣潘季馴謹題。爲祖陵當護。運道可虞。淮民百萬。危在旦夕。恭進開復黃河故道圖說。懇乞聖明采擇。以垂百年永利事。據管理中河郎中沈修南。河郎中羅用敬。曾呈奉臣劄付。仰司會同各道督同淮安府并山陽清河二縣各掌印管河官地老知音人等。親詣訾家營地方。逐一丈量查勘。要見清河縣東見行正河水面若干丈。今議新開支河。果否能分正流。日後可無淤阻。分後果否可保泗州永無水患。原議工食有無足用。黑墩湖羅豕口湖中起隄。作何設法濬築。

從長計議。毋求同而爲遷就之計。毋畏難而忘久遠之圖。斟酌停妥。會呈詳奪。以憑具題施行。蒙此。隨該職等督同淮安府知府張允濟。管河同知姜桂芳。山陽縣知縣張光緒。清河縣知縣鄒守約。桃源縣知縣華存禮。喚集彼處土人楊甫等。丈勘明白。回報前來。該職等議照國家興大役。舉大事者。非持意見以爲可否。惟深晰夫利害之辨而已。據府縣申謂。營家營支河一開。除目前之患。害收將來之全利。惡在乎其不可也。但查清河縣東見行正河水面濶二百四五十丈。其深約有三四丈不等。則支河之開。視全河必得三分之一。乃可分流而導之。使趨今議面濶止四十丈。底深止二丈五六尺。試以全河形之。果有三分之一乎。必須面濶底深。比原議丈尺稍增其數。方爲完計。若嚮其數於勘估之初。恐費病於不繼之請。似未可以原估五十五萬九千九百七十餘兩限之也。况黑墩湖又係窪濕積淤之所。夫以四十餘里平陸易淤之地。而欲新創導河入海之功。工力鉅艱。舉動匪細。鳩夫役必至數萬。奏成功須待經年。及今徐淮以南。歲苦大稔。二麥稍熟。復罹大疫。流移饑殍。枕藉相望。此何時也。瘡痍未起。閭閻蕭條。即以大工召募。給散工食。聊濟一飽而已。率疆仆甫起之民。而責以趨事赴工之敏。恐亦難矣。合無俯從該府之議。姑待年豐。興舉爲便。呈乞再加查議等因。又據整飭淮揚兵備副使周夢暘。潁州兵備副使楊芳。徐州兵備僉事陳文燧。會呈蒙臣案驗。會同管河分司行據淮安府勘議前



來覆該各道議照。自昔治水。惟有二策。非厚築隄堰。以遏橫流。則多開支河。以洩暴漲。而總之。審時度勢。乃可底績安民。若時事未便。漫然嘗試。未利先害。非計之得者。該府所稱警營之開。一舉四利。而挑濬情節。曲暢旁通。不爲無見。但工費頗爲艱鉅。帑藏又多空虛。淮民連歲災傷。瘡痍未復。目今秋旱燥烈。黍豆不登。窮冬苦寒。又恐糊口無策。而以煮粥聚賑。傳染瘟疫。枕藉而死者。十之二三。見存子遺之民。尪羸么麼。可靜而不可動。可逸而不可勞。萬分煦育。尤恐不能保其殘喘。而鳩數十萬之夫。挑五十里之河。計算時日。必數年之久。乃可竣事。是猶以疲癯奄息而責之艱重之任。未有不仆者。况五十里長途。滿目荒萊。居民流徙。竟日不聞鷄犬。見井竈。不惟數萬夫役。棲身無所。即督工官員。亦未有駐足之地。天時人事。俱屬不便。職等初議。亦謂年歉不能舉事。請行再議者。蓋與本府今議。大略相同。而非遷就畏難。不顧久遠之利也。相應准從等因。到臣。通候覆議間。又據管河郎中沈修羅用敬。徐州兵備僉事陳文燧。會呈爲河道事。本年八月二十六日。據淮安府管河同知姜桂芳揭報。本月十四日。清江浦外隄對岸清河縣地方。有鮑家營住民張思禮門首。勢當黃淮西南而來。直射東北。河水大漲。忽從本營漫流。濶二百餘丈。隨令大河衛經歷章淮率領本方熟知河道鄉民唐山。駕船隨流探勘水勢。歸向自本口東北十里。經官莊浪石二十里。至娘子莊。又二十里。至澗橋。又三十里。至古寨。俱係

湖蕩。又十五里至桑墩。入見成連河。抵牾頭關下新壩入海。此口離清河縣三十里。外係迎溜。內有河湖故道。即今分殺黃流。清江浦石隄以下一帶。可保無虞。緣由到職。先該職等據實揭報本院。訖。今蒙批行覆勘。爲照鮑家營正當王家營之上。警家營之下。既非運道。又非民居。先年不議築隄。留以分殺暴漲之勢。今清江浦外隄加築高厚。而黃河大漲。果有此分洩。自娘子莊徑由澗橋古寨以入於海。不勞工力。不費財用。而盈溢之勢可殺。清浦外隄可保。真天開之警家營也。若慮水落之後。難保不淤。而來歲水漲。勢必復洩。淤則平時無奪河之患。洩則臨漲有分殺之功。誠於河防有益無損。呈乞本院詳示。將本口照舊存留。以備分洩。惟於兩岸用埽包裹。以成河口。二三年後。時和年豐。再舉警營之議。未爲晚也。等因。各呈詳到臣。據此。先該臣准工部咨前事。該本部覆議。內開警家營支河以接草灣。較諸故道之復。固事半而功倍。要其入海之路。又散漫而難收。事既未見全利。議亦未敢遽決。今新任總理河臣潘季馴前後治河。將幾十稔。閱歷既久。聞見必真。所據支河之議。宜令覆行勘閱。恭候命下本部。備咨總理河道右都御史潘季馴。作速到任。將科撫諸臣所議。於警家營開支河以接草灣一事。覆行勘閱。果爲利多害少。在所當行。或爲徒費無益。在所當止。倘衆議未妥。別有長策。可以護祖陵。保淮安。固運道者。但求事可功成。不拘人已同異。即令從實具奏。以憑覆請定奪。等因。奉聖旨。是。這黃

河故道既勘議明白。難以開復。罷營家營。應否添開支河。還着河道衙門從長計議。具奏。欽此。欽遵。備咨到臣。該臣督同司道。并府縣等官親往營家營一帶地方。逐細閱視。行據各官會呈前因。正在詳審間。忽據徐州道僉事陳文燧揭報。清江浦外隄對岸鮑家營衝開一口。幾二百丈。水從本口入荒坡。往東北浪石舊河身。至娘子莊澗橋古寨。俱係湖蕩。又十五里至桑墩。入見成連河。分支一百餘里。下新壩入海。此口離清河縣三十里。與運河經行之處。眇不相及。而清江隄修築既高。水從西激。鮑口一開。清江隄乃完。運道可免嚙潰。改徙而上之順達泗水。下之分殺淮水。其入口至浪石娘子莊。即前勘議營家營經流之處。折至東北經澗橋達古寨入海。則又不必鑿五十里入赤晏廟。而水有所歸。是省六十萬金之費。以開營家營。此皆本院拯溺救民。忠誠仁愛。孚格蒼穹。照照者默助其成。不勞而底績也。僉謂若念營營工費難處。績效難成。而鮑家口不係運道。不淪民田。俯賜存留。以代營營無損之益。輿情自安等因。又據管河同知姜桂芳揭報相同。俱經臣批行司道覆勘。及親閱相同外。今據前因。爲照論天下之大事者。創其始必先究其所終。成天下之大計者。圖其利必先慮其所害。若聊且虛應於一時。而漫然爲嘗試之舉。舉之未幾。廢即隨之。咎將誰歸。且工役以十萬計。時以年計。工費幾六十萬計。勞民動衆。關係不小。我皇上以科臣之言。下之科撫。而復以科撫之言。下之於臣。亦誠以事體

艱重未可易耳。臣敢不虛心博訪，以仰體皇上至嚴至慎之意乎。臣於六月十七日一接邸報，即率同各官躬往闕視。訾家營委與清口相對，地勢平衍，并無崎嶇險阻。中間雖有黑墩湖、羅家口二處，頗難濬築。然工力稍倍，亦似可成。開成之後，分流甚便。由此而至顏家口四十五里，由顏家口而至赤晏廟，復與大河相會不遠矣。分流之後，欲殺泗州水勢於二百里之外，固不可得。而清江浦外伏秋之漲，委爲可減。但該府原議工費五十五萬九千，止言濬河而不及築隄。若欲比照舊例，建築遙隄，運土於一二里之外，其費又當倍之矣。計土論方之法，固是舊規。而濬至一丈之下，地泉迸出，非十倍其工不可。則其費亦未可知也。然成大事者，不惜小費。此亦未足論也。臣所慮者，河性喜深廣而避淺隘。今以濶四十丈深二丈五尺之河，而欲與濶二百四五十丈深三四丈者同流並駛，日後難保不淤。伏秋之時，河水消漲不常，旋淤旋濬，恐滋煩苦。若欲加濬深廣，費須數倍。非惟錢糧難措，抑恐妨奪正河。蓋河不兩行，自古記之。先年河臣劉大夏、劉天和、王以旂諸臣，有開孫家渡以殺水勢者。有濬趙皮寨以濟二洪者。有開李景高口引水出徐者。皆不久即淤，可爲明鑒矣。當此中外告匱之時，萬一虛費工力，罪將誰諉。司道府臣係原勘原議之官，而懇懇以荒歉請停爲辭，其意亦可想見。臣又查得漕撫侍郎舒應龍工科都給事中常居敬原題內開，訾家營經黑墩湖、羅家口，恐有散漫之虞，亦未敢爲必

然之畫。倘以祖陵山麓之水。未及玄宮。運道之危。在清江浦者。先年已有石隄。目前加築埽隄。尙可保無決裂。淮黃交滙之地。昏墊之害。祛之於西者。不免移之於東。則今議支河。重役鉅費。非有全利。若未可以輕舉而試爲之。如必欲爲淮水疏洩之謀。求人事之可盡者。固不能舍此有他圖耳。等因。是二臣之見與臣亦不甚異。臣所以展轉思惟。未敢遽決者。此也。今據司道議有新開鮑家營去警家營密邇。旣非運道經行之處。亦無民田損害之虞。入海另由別路。可免大河合後復漲之事。雖水落勢必復淤。與慮警家營者無異。但不費一塵。可免後悔。而漫流廣濶。淤不甚高。來歲水漲之時。勢必復通。淤則平時無奪河之患。通則臨漲有分殺之功。與崔鎮等減水四壩無異也。姑俟三四年後。本口衝刷成河。留之固善。若沙淤漸高。水流不順。時或地方豐稔。民力稍甦。再議別圖。亦未爲晚。所據司道諸臣之言。似爲有見。此皆仰仗我皇上留心國計。軫念民勞。上帝鑒臨。百靈效順之所致也。合無將本口兩頭埽護。留備分洩。其原議警家營工程。暫行停寢。伏望敕下該部查議。如臣所言非謬。覆請允行。臣愚幸甚。地方幸甚。緣係祖陵當護。連道可虞。淮民百萬。危在旦夕。恭進開復黃河故道圖說。懇乞聖明采擇。以垂百年永利。事理謹題請旨。奉聖旨。工部知道。

## 工部覆前疏

題爲祖陵當護。連道可虞。淮民百萬。危在旦夕。恭進開復黃河故道圖說。懇乞聖明采擇。以垂百年永利事。該總理河道右都御史潘季馴題前事等因。奉聖旨。工部知道。欽此。欽遵。抄出到部。送司案查。萬曆十六年三月內。該禮科給事中王士性題前事。內議開復黃河故道等因。奉聖旨。着工部便行與漕運衙門及勘河科官。從長計議來說。欽此。已該本部備行查勘河工。都給事中常居敬總督漕撫侍郎舒應龍題稱。黃河故道難復。營家營另開支河。順入草灣河緣山。已經本部覆奉聖旨。是這黃河故道。既勘議明白。難以開復。罷營家營。應否添開支河。還着河道衙門從長計議。具奏。欽此。已經備行總理河臣。曾同司道各官勘議去訖。今該前因。似應具題。案呈到部。看得營家營另開支河之議。蓋爲黃河故道難復。欲別求一策。以殺泗州水勢。本不得已之計也。彼時科撫諸臣。查勘及臣等議復業已。謂其難行。特事關運道民生。非經詳覈。遽難定議。故行河臣復勘。以求畫一之說。今潘季馴督率諸臣。躬親查閱。謂其水性之難強。錢糧之難措。工績之難成。種種不可開濬之狀。昭若指掌。與部科原議。若相吻合。又况鮑家營突衝一口入海。

甚徑。非若營之迂繞。不煩工力。非若營之勞費。淤則平時無奪河之患。洩則臨漲有分殺之功。然則營家營支河。非惟不當開。亦有不必要者。相應如議。候命下本部。備咨總理河道衙門。及劑付中河南河郎中。備行各該道府州縣官員。一體遵奉施行。奉聖旨。營家營既難開濟。罷見今河道疏通。只着該管官員。遵守成規。用心隄防。不許妄生意見。阻壞成功。徒滋勞費。

### 修復湖隄疏

臣潘季馴謹題。爲修復湖隄。以便蓄水濟運事。據管理南旺泉閘主事王元命濟寧道按察使曹子朝分守東兗帶管分巡兗州道參政郝維喬呈。蒙臣劄案。俱爲檢查節奉欽依。河工分派司道各官。以便責成。以圖竣事。分行司道。遵照工部議覆工科都給事中常居敬原題各項工程。勅限興舉。除將應修閘壩斗門等工。俱已如法整砌將完。馬踏安山二湖。應築約水土隄。見今工有次第。通候另報外。其蜀山馬場南旺三湖。各原議築束水子隄一道。以爲封界。及南旺河中隄一道。嚴督官夫修築間。節據委官兗州府同知陳昌言等呈稱。各湖先年創有封疆老隄。穴至隄根。十常八九。後因隄防廢弛。湖水漸蓄。蒙工科踏勘之時。正值亢旱。舉目禾黍。故

議築子隄。中亘長隄。隄內蓄水。隄外名佃。官民兩便。但自去歲夏秋恆霖。斗門洞開。坎河壩築。涓滴不遺。水勢瀾漫。即今湖中築隄。不惟水深工難。縱築成隄。內外汕刷易圯。又恐湖狹水微。似非濟漕初意。且地被水占。亦難召佃利民。查得嘉靖二十二年兵部侍郎王以旂清復湖界。築有大隄。年久傾廢。似應修復。蜀山湖西南一帶。俱臨運河。隄岸高聳。無容別議。其東北一帶。自南頭馮家滾水壩起。至蘇魯橋迤南大隄頭止。俱有舊隄根址。相隨修復。自大隄頭至南旺田家樓止。原係受水門戶。今應密植柳株。以正封界。水至入湖。爲運河之資。水退據柳。爲民田之限。馬場湖地勢南面臨河窪下。出水濟運。北面原係入水渠道。今宜照舊。仍留入水。密栽柳樹。以爲湖界。東面舊隄。約長八里餘。相應修復。南旺湖東面高埠。遵照原議。量留一里。築子隄一道。其餘三面。應將原隄建復。其中亘長隄。正在湖中。難以施工。相度地勢。應濬溝渠。通接斗門。庶爲完計。各具呈前來。覆該司道親閱相同。委屬妥當。雖與原議稍有不同。求其濟運利賴。則一。呈乞酌議題詞等因。到臣。據此。卷查先該臣查將工科都給事中常居敬原題。查復南旺等五湖。築建隄壩閘座等工。分委北河郎中吳之龍查復馬踏湖。建永通閘。築子隄。修王岩口滾水石壩。南旺主事蕭雍查復蜀山湖。建坎河壩。築東水隄。修滾水大壩。濟甯道按察使曹子朝查復馬場湖。建通濟閘。築子隄。修安居斗門三座。分守東兗道參政郝維喬查復南旺湖。修



邢通等斗門十三處築封界隄。中亘長隄。分巡兌州道僉事劉弘道。查復安山湖築封界隄。建八里灣似蛇溝兩閘等因。具題該工部覆議。備咨總理河道轉行司道各官。查照分地。竭力修治。倘興工前後。或有事體與原議稍異者。即便從宜處置。或有原議未盡者。不妨別議增補。通完奏報等因。覆奉欽依。咨臣通行司道。督率興工。勒限報竣。去後。今據前因。覆閱相同。除將閘壩斗門等工。及馬踏安山兩湖應築隄岸。俱照原議。候通完覈實類奏外。該臣看得運艘全賴于漕渠。而漕渠每資于水櫃。五湖者水之櫃也。先該勘工科臣常居敬。洞燭其源。倡爲封界子隄之說。蓋因比時旱魃爲災。湖身龜裂。地方之民。乘時射利。盡爲禾黍之場。故欲築隄限之。非濬湖以就民。乃限地以蓄水也。良法美意。可謂善之善者。第自去年六月以後。天雨頻仍。湖水盈溢。不惟湖地難耕。卽民地亦成沮洳矣。詢之湖濱年老之人。皆云如此景象。向來歲居十七。今欲盡洩湖水。勑築子隄。亦甚易易。但恐築成之後。隄泡水中。立見傾圮。而子隄之外。必成夾河。豈能耕種。隨查得先臣兵部侍郎王以旂原有土隄一道。意與科臣常居敬封界正同。而圍湖稍廣。蓄水更多。今歲之水。正及隄址。止因年久浸廢。界址不明。乾旱之時。遂有越界私種者矣。若將此隄加幫高厚。盡復舊業。隄內爲湖。隄外爲地。納水處所。不便築隄。密栽水柳爲界。庶湖水不縮。經界不淆。而亦不失科臣原題之意矣。其南旺湖中隄。亦內積土。成功固艱。隄成

水泡。汕刷必易。似宜免築。所據各司道之議。相應依擬。具題伏乞救下該部。再加查議。如果臣言不認。覆議上請。行臣遵照。督令上緊修築。勒限報竣。謹題請旨。奉聖旨。工部知道。該工部覆奉施行。

### 就近銓補分司疏

臣潘季馴謹題。爲河防緊急。乞恩就近銓補賢能官員事。臣於三月十六日。據徐州兵備兼管河道按察使陳瑛揭稱。南河郎中羅用敬於三月初八日。忽患喉毒病故。見今河務方殷。缺官管理等因。臣查得本官所管高家堰。清江浦。范家口等處。俱係兩河要害。歲修之工。方在興舉。寶應縣西土隄。邵伯石隄。適當諸湖之濘。題奉欽依修築。尙未告竣。郎中羅用敬。畢力肩承。業有成績。忽爾奄逝。臣實痛心。除候工完之日。將本官另行叙報外。臣竊照欽修之工。原限三月。以裏。併日而作。猶懼愆期。矧夏令去今。不過數日。伏秋之備。正在此時。若候推補前來。遷延便須數月。廢時失事。必致疎虞矣。該臣曾同總督漕撫侍郎舒應龍。看得管理清江廠兼管閘座工部營繕司署員外郎事主事黃日謹。提身猶潔。任事精詳。司閘禁而怨讟不辭。淤墊之患可免。嚴廠務而功費俱省。侵尅之弊頓清。况久處兩河之濱。聞見甚確。習知通塞之故。疏治不難。

若將本官轉擢南河郎中。就近到任接管。則河防得人。而官不久虛矣。及又查得臣於萬曆十六年十月內題爲申明修守事宜。以圖永賴事。該工部覆稱。今後中南兩河郎中員缺。敕下吏部。卽于工部主事查有曾經分司河上。及歷俸稍淺者。遴選推補。俟後職業克修。容令歷俸九年。方爲破格遷擢。題奉欽依在卷。今員外郎黃曰謹。正係曾經分司河上之官。若令銓補。久任九年。方行遷擢。則非惟目前得其分陬之力。而遲之歲月。必收永賴之功矣。其清江廠員缺。另行推補。伏望敕下吏部。再加查議。如果臣等所言不謬。覆請施行。河道幸甚。臣愚幸甚。謹題請旨。奉聖旨。吏部知道。該吏部議覆相同。題奉聖旨。是。

### 就近銓補河官疏

臣潘季馴謹題。爲黃河要地缺官。乞恩就近銓補。以防伏秋事。臣於三月十六日接到邸報。內開南京戶部湖廣司缺員外。推淮安府同知徐紳陞補等因。該臣查得徐紳爲管河同知。北自夏鎮珠梅閘起。歷豐沛蕭錫徐邳靈睢等處。至桃源縣止。一帶黃河。俱係本官管理。而中間埽灣迎溜。素稱善決者。無處無之。故河防惟以中河爲難。而司道官之所責成者。惟同知一人而已。矧今時將入夏。去伏不遙。捲埽護隄。正當預備。斷斷于畚鍤之內。逐逐于河漕之濱。殆未可

以頃刻缺人者也。若候銓補，依限前來，未免耽延時日。倘從遠方陞調，則又未可以時日計矣。臣查得駐劄楊村河間府管河通判申安，歷任甚著賢聲，修防業有成效。曾經通惠河郎中陸夢熊揭薦到臣，楊村河患頗少，未展其才。山東德州知州趙可學，才識通敏，施爲練達，節該河道，開薦到臣，查訪委爲可用。臣於去年十二月內，將二臣具疏列薦之矣。若於內揀選一員，加以同知職銜，前來管理河事，必克有濟。而二臣見任地方，去中河不及千里，恭候命下之日，容臣促令兼程趨任。洩旬即可接管，倘以本官資俸未深，明開疏中，令其久任於河道，更爲有裨。伏望敕下該部，再加查議。如果臣言不謬，覆請陞補施行。庶河防得人，而要地不至久於缺官矣。謹題請旨，奉聖旨，吏部知道。該部議覆，通判申安陞補，題奉聖旨，是。

### 查議通濟閘疏

臣潘季馴謹題。爲目激時事，敷陳愚悃，以裨治安事。據管理閘座工部署員外郎事主事黃曰謹，徐州兵備兼管河道按察使陳瑛，海防兵備帶管南河工部分司副使周夢陽，曾呈蒙臣案驗，仰各司道速查清江裏河通濟閘。今日開春啓閘之後，是否波濤內訌，不能閉閘，迴瀾水勢，較比往年，有無滿激，即今應否改移閘口于稍南，安是何頃地名，有何便利，可避河流之衝，此

外有無別所另尋一路。堪以濟運。清江浦口應否填築。以收永利。務要躬親相度。會議妥當。呈詳覆議具題。蒙此。行據淮安府呈稱。督同管河同知等官姜桂芳等。查勘得通濟閘建立甘羅城墜實之地。兩崖頗高。撻挽甚便。水勢北趨。河流平緩。運艘往來。頗稱利便。所據閘壩不必改移。宜從舊貫等因。據此。該職等親詣前項地方。督率多官。覆加查勘。謹按舟從今通濟閘出口者。以此口專向淮河。獨受清水。惟伏秋大漲。黃流未免到灌。故於入伏之時。閘外捲築輓壩。無非爲避黃計也。至九月水落。仍復開壩由閘。蓋自九月以後。至五月以前。通濟之水有清無濁。三閘遞相啓閉。其法甚便。故先年改天妃閘而爲通濟閘。以天妃閘當黃。而通濟閘近清也。見今糧運通行。水皆清平如舊。旋啓旅閉。類爲不難。况昔黃流只有一道。今分流草灣一百五十餘丈。已減全河大半。若欲改閘而南。必從淮城以下出口。張口受黃。日有沙壅。是平江伯建閘以避濁。今返背清而就濁矣。全河大勢已奔草灣。而清浦西橋一帶漸淤。復從淤處建閘。是又舍通而就塞矣。且板閘鈔關。與船廠倉庾。戶工各部三分司。皆在清江沿河地方。以便督造抽分。二百餘年於茲矣。今若改閘而南。則清江板閘一帶。必至乾斷。三分司與諸閘廠。俱當改建。爲費不貲。三閘延袤六十餘里。人煙輳集。仰商賈挑盤之利者。萬有餘家。若閘改而南。必奪生理。移署遷民。事在得已。况糧艘經由清浦。如履盤孟之內。甚爲平穩。遽從淮南出口。是舍清夷

之渠。而多受黃河六十餘里。播掩之苦。仍恐運軍亦難之耳。再詢淮中士夫。皆稱淮城風水。前有清淮。後有黃河。環流迴抱。有如襟帶。乃縉紳牛靈之血脈也。今從淮南建閘。將使淮地中斷。而自絕其襟帶矣。談者多稱不利。難以拂衆。疏圖及勘通濟閘迤南一帶。別無可通舟楫之所。職等反覆思維。誠不如仍舊爲便。呈乞本院定議。題請等因。又據清江管閘分司呈稱。蒙臣憲牌。仰司即查通濟閘入春以來。有無黃流內入。波濤湍激。是否不能閉閘。迴瀾各閘啓放之後。因何不行下板。備將致害緣由。從實呈報。依蒙查得清口。乃糧運咽喉所係。自有通濟等閘啓閉以來。順時節宣。河無漲溢。成效如觀。去冬遵守新立傳籌規矩。啟一閉二。遵行無失。入春黃水未發。糧運出口。絡繹無停。三閘俱開。晝夜催僱。時難暫閉。外水雖入。悉皆清流平緩。若糧船出盡。即遵前法。啟閉。况今清江外隄修築完固。附隄淤土。一望數十餘丈。決無他患。緣由各呈報制臣。據此案。照萬曆十七年三月初九日。准工部咨。該南京戶科給事中徐常吉題。欸開。四曰。淮揚水患。清江浦口。運艘所經。而頻年以來。黃河內衝。出入爲梗。安東之流日緩。而浦口之入漸多。今自開春之後。運船出口。千檣并集。舳艫相銜。未免啟閘以納水。而波濤內訌。不能閉閘以迴瀾。水勢亟矣。乞敕該部。轉行總理河道衙門。多方籌畫。或移閘於稍南。以避清河之衝。或通漕舟於別所。以爲萬世之利。其清江浦口。則令築壩堵截。不許復開。如此則庶幾民生可

保不然開口受沃而束手待盡。臣恐湍激之黃流將直穿乎高寶而百萬之蒼生且胥而爲魚。繫此淮揚水患。臣之所可憂也。等因。題奉聖旨。該部知道。欽此。欽遵。備咨行臣。即查前項閘口。應否可移于稍南。漕舟有無可通於別道。其清江浦口。應否築堵。不許復開。凡奏內事情。一一從長計議。妥當具題前來。以憑覆請施行。准此。先該臣接到邸報。隨即督同南河郎中羅用敬。淮安府署印同知趙珩。山陽縣知縣張光緒等。親詣淮城以南東壩地方。及通濟閘以下清江浦等處。逐一踏看。猶恐未確。又經案行各司道查勘去後。今據前因。該臣查得國初踵習元人故事。以海爲運。永樂年間。平江伯陳瑄鑿清江浦一帶。以通淮黃兩河。始以河爲運矣。然清浦原無來流。全借河流內灌。方可浮舟。而黃流甚濁。恐至淤墊。故復設天妃等五閘。遞互啓閉。以便節宣。時將入伏。閘外即築輓壩。一應船隻。俱於五壩車盤。良法美意。二百餘年利賴之矣。後因天妃閘全納濁流。故復改於三里溝。尋復改於甘羅城。即今之通濟閘是也。此處爲南河口。乃淮水獨經之地。離黃向淮。用清避濁。漕渠無淤墊之患。舟航有利涉之休。人甚便之。惟於五六月間。黃水盛發。不免逆上。與淮并入。而時將入伏。築壩斷流。九月開壩。則黃水業已退矣。今給事中徐常吉題。請移閘稍南。迤漕別所。極爲計謨長慮。如果徙避有地。真爲萬世之利。但細查淮郡之外。別無支流可引。欲迤漕舟。不得不資兩河。欲資兩河。必難免其內灌。然分流不

及十分之一。而濬濬北去。由安東入海者。固如故也。若移閘愈南。則納濁愈甚。司道諸臣所云。背清就濁。舍通就塞。而連艘多涉險阻。六十餘里。皆所不免矣。至如改建衛門。遷移廠閘。費雖不貲。無足論也。臣又查得初春水落。正當平緩之時。止因連艘晝夜放行。諸閘不便下板。傳者遂謂不能啓閉。今運艘如期出口。各閘啓閉如故。委與該司查勘相同。臣不敢蔽。伏望敕下該部。再加查訪。擬議上請。或行撫按及巡鹽巡漕衙門。覆加勘議。務求久安長治之策。以爲河漕永賴之計。地方幸甚。臣愚幸甚。謹題請旨。奉聖旨。工部知道。

### 工部覆前疏

題爲目激時事。敷陳愚悃。以裨治安事。該總理河道右都御史潘季馴題前事。奉聖旨。工部知道。欽此。欽遵。抄出到部。送司案呈到部。看得我國家歲漕東南。數百萬石。以海運非便。故鑿清江浦。引淮黃二水。以通漕舟。又建通濟等閘。以避黃而就淮。此法行之二百餘年。未有能變者。給事中徐常吉慮黃水灌淤。條議移閘。塞清浦。似或有見。今據總理河臣潘季馴督率多官。再三籌度。謂清浦若塞。更無別道可通漕舟。閘座若移。則去淮流益遠。而納濁流益甚。受濁不若受清。故更新不若仍舊。其說甚明且悉。而河臣猶不敢自是。復請下撫按及巡漕巡鹽御史。



覆議。臣等以爲清江浦之于運道。譬若人身之咽喉。即使少有淤阻。不過隨宜修濬之耳。未聞寒其咽喉。而別求吐納之處者。况清浦見無淤阻。而別處又無可通漕。既經踏勘明白。似惟仍舊爲便。不必再議。恭候命下本部。備咨總理河道。并巡撫漕運衙門。及咨都察院。轉行巡按。巡漕。巡鹽各御史。并劄付南河清江廠郎中主事。一體遵奉施行。奉聖旨。清江浦運道。見在通行。只着照舊修守。不必再議更改。

### 河工告成疏

臣潘季馴謹題。爲省直河工告竣。據實恭報。仰慰聖衷事。節據南直隸中河郎中沈修。南河郎中羅用敬。夏鎮主事余繼善。海防兵備副使周夢陽。徐州原任兵備管河僉事陳文燧。見任按察使陳瑛。潁州兵備副使楊芳。會呈。節奉總理河道。并總督漕撫衙門劄案。俱爲檢查。節奉欽依。河工分派司道各官。以便責成。以圖早竣事。行職等。將先後題准。應修土石工程。勒限興工。上緊報竣。職等遵依督率。分委府州縣等官。親詣工所。如法率作。俱至萬曆十七年四月二十九等日。通完訖。總計築過邵伯寶應界首三里。湖高郵南北小湖口鹽壩南隄。高家堰天妃壩。清江浦惠濟祠禮字壩。范家口柳浦灣。潘家壩。張家窪。馬家湖。黑墩。柳家窪。金家窪。賈家窪。王

家口張福口塔山并護陵石隄共長七千一百六十五丈八尺土隄共長一萬三千五百七十五丈椿笆隄工共長六千二百九十丈六尺築過順水草壩十四座石磯背一座蓋過柳浦灣料廠一所建過鎮口閘一座增砌過古洪內華閘二座挑濬過裏河淤淺并濬支河澗河及開鎮口閘上下河道共長一萬一千六十九丈九尺塞過決口長一百二丈填築過喻口河壩一道其各隄高卑酌量地形低昂水勢緩急稍有增損俱經呈明除長濶高厚丈尺數目已蒙各院及委官親詣各工逐一覈實訖職等議照上下江運艘皆由瓜儀歷邵伯高寶淮徐至茶城以入漕河延袤千里中間湖波萬頃則有風濤之虞流沙久積則有淤墊之虞兩河湍急則有衝決之虞淮黃交接則有沙澀之虞故邵伯東隄每至傾圮寶應西口率多淺阻清口茶城濁流難免逆上而范家口天妃壩隄岸坍塌相繼衝決淮揚幾爲魚蟹此往專之明徵也至如高堰一隄尤爲二河關鍵隆慶初年淮水從此潰入黃亦隨之而東海口無水衝刷因之壅塞而淮揚興鹽高寶之間則一望瀰漫桑田爲海矣自萬曆七年修復本堰之後兩河始歸故道近年以來隄防久弛漸至油刷誠爲可慮幸蒙部院科臣先後具題濬築之工至周大備職等遵奉節行案劄起派官夫分投興舉晝夜督促如期告竣除用過錢糧見在覆查另行造冊送覈外所據完過工程擬合開坐呈報等因又據揚州府推官李春開鳳陽府推官蓋國士會呈蒙

總理河道并漕撫按鹽各院俱行職等前去各工覈實依蒙徧歷邵伯寶應界首高郵高堰天妃清江浦惠濟祠禮字壩范家口澗河柳浦灣張家等窪張福口王家口鎮口閘塔山縷隄古洪內華二閘及護隄等處逐一錐探土隄委係老土夯實驗勘石工俱各整砌堅緻河渠深廣一一足數合式經久可恃隨具不致扶同甘結呈報前來又據山東管理北河郎中吳之龍管理泉閘主事王元命濟寧兵河按察使曹子朝分守東兗道左參政郝維喬分巡兗州道僉事和震會呈蒙總理河道并撫按衙門備行職等分督修復湖隄建築閘壩斗門等工鳩夫辦料刻期完報依蒙督委府州縣等官修築過馬場馬踏蜀山南旺安山五湖土隄共長三萬二千五百五十一丈三尺建過火頭灣通濟閘梭隄迤南永通閘八里灣似蛇溝閘共四座坎河口何家口馮家口五里舖各滾水石壩共四座安居五里營十里舖關家大閘常明孫強劉家焦纒濟運閘盛進張全各斗門共十一座砌過石隄四丈築過土隄二百九十五丈又挑過建閘河身長八十四丈順水溝渠長一千一百七十四丈六尺填過水口十一處築過河口一處栽過護隄臥柳一萬六千一百五十株封界高柳六千七十一株俱於萬曆十七年四月二十五等日通完訖職等議照運艘入鎮口閘直至臨清板閘一帶漕渠共計八百餘里皆藉汝河之水以資利涉而漕渠頗遠泉源頗微故多設閘座以便節宣修復南旺等五湖以便瀦蓄建立

減水開壩。以便出納。皆爲治漕要務。不可不講求者也。近年以來。法久寢廢。一遇亢旱。遂同涸轍。幸蒙勘河都給事中常居敬前來。會同撫按。躬親踏閱。逐一檢查。將封殖五湖。建復開壩斗門等項。會疏題奉明旨。通行總河及撫按衙門。轉行職等。分派工程。定立期限。晝夜督促。幸以告成等因。及據山東按察司按察使葉夢熊。呈蒙總理河道及撫按衙門憲牌行職。查得馬場等湖隄。永通等閘。坎河等壩。安居等斗門。各項工程。委係精緻堅實。別無滲漏。今具不致扶同甘結。呈報等因。各具呈到臣。據此。案照萬曆十六年閏六月廿九日。准工部咨該查勘河工都給事中常居敬。題爲欽奉敕諭。分別効勞官員。以勵臣工。以重河漕事。本部議覆。內開案查萬曆十五年十一月內。該鳳陽巡撫都御史楊一魁。題爲議處兩河水患。以固運道。以奠民生事。內議修砌范家口等處隄岸。并改拆崔鎮等壩。及疏草灣河口緣由。本部覆奉聖旨。崔鎮壩應否改拆。還候差去科臣。到彼再議定奪。其餘俱依擬。着實行。欽此。隨該本部備行鳳陽巡撫。及差去科官欽遵。訖。萬曆十六年四月內。該查勘河工都給事中常居敬。會同總督漕運戶部右侍郎舒應龍。題爲欽奉敕諭。管理河漕。以保運道事。內題議古洪以外。添建鎮口閘。并修築運河隄岸。及停拆崔鎮等壩。停濬草灣等緣由。又該本部覆奉聖旨。依擬行。欽此。備行淮揚撫按轉行管河司道各官一體欽遵。訖。本年四月內。該都給事中常居敬。會同山東撫按。題爲欽奉

救諭。查理漕河。以重國計事。欵開南旺湖。修築子隄。中且長隄。修復邢通等斗門共十三座。馬踏湖東北築隄。修復王岩口石壩。蜀山湖周圍築隄。修復馮家大壩。馬場湖周圍築隄。修復安居斗門三座。及修坎河口滾水石壩一座。長六十丈。建火頭灣通濟閘梭隄。集永通閘各緣由。又經本部覆奉聖旨。依議行。欽此。備行山東撫按轉行司道等官。欽遵。本年六月內。該都給事中常居敬。會題爲清復湖地。以濟運道事。要將安山湖低窪處。封爲水櫃。及八里灣似蛇溝。建閘二座緣由。又該本部覆奉聖旨。這湖地依擬築隄。仍畫定界限。永遠遵守。如有侵占盜決等弊。照前旨着實參治。其各處泉湖蓄水濟運的。都着一體清查整理。欽此。已經備行南北直隸河南山東各巡撫衙門。轉行管河司道各官一體欽遵。今科臣常居敬。比照閘邊事例。將各管理諸臣分別勤惰。題請。但在淮揚則經理之議甫定。在山東則濬築之役方興。見今總理大臣新到。一切調用人夫。參酌河務。似應候各工通完之日。併議優處。仍咨總理河道鳳陽山東各巡撫衙門。轉行管河司道各官。查照本部節題事理。將見在工程及河道應行未盡事宜。上緊督催。完日將做過工程。役過人夫。用過錢糧等項。覈實造冊奏繳。清冊送部備查。候工完之日。河道都御史仍將大小官員。分別舉劾。另行具題。以憑覆請賞罰施行等因。具題。節奉聖旨。是直隸山東等處工程。通候完日。河道衙門奏報併叙。欽此。備咨到臣。本年八月初五日。又

准工部咨爲檢查節奉欽依河工分派司道各官以便責成以圖早竣事先該臣題議除將修建鎮口閘塔山支河縷隄修清江浦外隄草壩添設柳浦灣料廠先該漕撫侍郎舒應龍行委南河郎中羅用敬中河郎中沈修夏鎮主事楊信徐州兵備僉事陳文燧見在興舉臣照舊督行各官上緊修築外其興築寶應縣西土隄二十里砌邵伯湖石隄二十里疏濬淮安至儀真一帶裏河淤淺查係南河郎中羅用敬海防道副使周夢暘地方三工俱當以中爲界北段屬之羅用敬南段屬之周夢暘其在山東各工分委北河郎中吳之龍查復馬踏湖建永通閘築子隄修王岩口石壩南旺主事蕭雍查復蜀山湖建坎河壩築束水隄修滾水大壩濟寧道按察使曹子朝查復馬場湖建通濟閘築子隄修安居斗門三座分守東兗道參政郝維喬查復南旺湖修邢通等斗門十三處築封界子隄中亘長隄分巡兗州道僉事劉弘道查復安山湖築封界隄建八里灣似蛇溝兩閘等因該部覆議備行總理河道并鳳陽山東各巡撫衙門一體遵照施行及行管理河道泉源閘壩司道各官查照分地督率府州縣管工官員竭力修治本部仍咨都察院轉行各該巡按巡鹽御史各照所轄地方不時稽察工程期于同心共濟倘興工前後或有事體與原議稍異者即便從宜處置或有原議未盡者不妨另行增補悉如原題定限十七年三月終通完其總河大臣仍親自查閱委果工程堅固足保無虞從實奏報其

効勞大小官員分別勤惰題請以俟賞罰等因。覆奉聖旨是河道工程着司道等官各照分定地方用心管理。上緊完報不許疎玩。欽此。備咨前來。本年十月十四日又准工部咨爲申明修守事宜。以圖永賴事。該臣條議一接築舊隄以防淤淺。本部覆議清口乃淮黃交會而淮黃原自不敵。然清口所以不致壅淤者以全淮皆從此出。其勢足以敵黃也。若分之則必致壅淤。先年淮決高堰而清口遂成平陸。可鑒矣。今王家口隄被商販盜決。淮流之勢已分。將來清口淤淤運道阻塞。患必由之。此隄在清河縣對岸而該縣任其盜決。罪將誰誘。今議欲行司道官接築長隄。專責清河知縣管理。修守疎虞參治。庶幾責任既專而隄防可固等因。覆奉欽依。咨臣俱經通行司道。勒限興工。間節據司道呈報。南河分司工內天妃壩原議內外包石。後蒙工科親閱本壩地勢廣闊。諭令內填實土。不必砌石。清江浦外隄原議險要去處捲埽釘椿。并作順水壩十四座。今酌量水勢緩急。添築草埽排椿長四百八丈。止築草壩四座。惠濟祠外河石隄加石二層。并添順水草壩一座。裏河石隄原議五十七丈。今減去平緩處所一十三丈。實砌過四十四丈。范家口石隄原議長四百丈。今覆勘隄堅水緩去處減砌七十丈。實砌過三百三十丈。海防道工內邵伯湖原題應築石隄二十里。除舊石頗堅。量加修補。不敢算工外。實砌過石隄一千八百九十八丈八尺。夏鎮分司工內塔山縷隄原議六百六十丈。今加築三百三十六

丈共長九百四十二丈。古洪閘原議改造。今因添建鎮口閘。啓閉頗易。不必更改。以滋虛糜。止議本閘并內華閘各加石四層。鴈翅加石五層。北河分司工內原議王岩口建壩。今酌量地勢。即於本口之上地名何家口。建滾水石壩一座。並增修房家口石隄四丈。築塞河口一處。南旺分司工內續議填築水口十一處。坎河壩兩頭接築土隄共長二百九十五丈。迎水處所俱用灰石壘護。分守東堯道工內原議修復斗門十三座。今議照舊修復八座。其餘五座。改於五里舖添建滾水大石壩一座。長五丈。開挑順水溝渠長一千一百七十四丈六尺。各緣由前來。萬歷十七年三月二十三日。又准工部咨。爲修復湖隄。以便蓄水濟運事。該臣具題本部覆議。南旺蜀山馬場三湖。目今水勢瀾漫。直及舊隄根址。去年所議築子隄長隄處所。見今俱在湖心。難以施工。欲行免築。要將舊隄培築高厚。納水處所。不便築隄。仍密栽柳樹。以爲封界。雖與科臣原題稍殊。而其爲蓄水濟運則一。且圍湖更廣。蓄水更多。相應如議。備咨總理河道轉行司道。府州縣官一體遵照施行等因。覆奉聖旨。是欽。此。咨臣通行遵依緣由。俱各在卷。及查原委。司道南旺主事蕭雍夏鎮主事楊信徐州兵備僉事陳文燧分巡兗州僉事劉弘道工俱有緒。各以限滿陞官離任。隨行接管主事王元命余繼善按察使陳瑛僉事和震督理臣等向在嚴催。節據各工報完。隨即躬親閱視。惟恐頭緒多端。中間倘有隱瞞丈尺。工少報多。又經覆委南



直隸揚州府推官李春開鳳陽府推官蓋國士山東按察司按察使葉夢熊各查覈去後。今據前因。該臣議照我國家定鼎幽燕。歲漕四百餘萬。以實京師。自瓜儀至淮安。則資湖。自淮安至徐州。鎮口。則資河。自鎮口。則至臨清。板閘地方。則資汶。湖河。滄洞之水。其患在滂。汶泗。涓涓之流。其患在涸。固其隄使之可捍。深其渠使之可容。此治滂之法也。湖以蓄之。使其不匱。閘以節之。使其可續。此治涸之法也。所據部科諸臣先後具題。築濬諸工。種種皆切河務。蓋邵伯隄固。而湖水無泛濫之虞。寶應隄成。而閘口免回沙之積。高堰無傾圮之患。則淮揚免昏墊之災。淮河絕支歧之流。則清口有專攻之力。茶城鎮口之增建。深得重門禦暴之策。永通通濟之添閘。自無長渠濟運之艱。五湖隄界既明。則汶泗停涵。而不時之需可待。斗門閘壩既設。則蓄洩有所。而湖河之利相須。汶水西趨。而泉河易竭。故坎河大壩之關係匪輕。汶水北注。而南旺之東流必少。故何家一壩之利賴不小。至如捲築椿埽。加幫卑薄。雖非一勞永逸之計。然亦每歲修防之必不可已者。臣謹遵成議。畫地分工。各司道併力一心。刻期告竣。然事連省直。興作之頭緒頗多。而羣力難於畢舉。工歷三時。官夫之勞苦難任。而人情易於怠弛。仰賴我皇上誠孝上格乎玄穹。祇靈助順。威德殫孚於蒼赤。黎獻傾心奉職者。咸效靖躬之義。趨事者。俱竭子來之誠。俾臣等得竭犬馬之勞。以效涓埃之報。厥功告成。絲粟皆我皇上神聖之所致也。臣愚不

勝慶幸。除用過錢糧。候委官查明。另行造冊奏繳。及將効勞官員。遵旨另疏叙錄外。今將各工通完數目日期。擬合從實奏報。爲此具本開坐。謹具題知。

計開

### 南直隸工程

總管官海防兵備道副使周夢暘。與同原任南河郎中羅用敬。督同揚州府通判劉汝大等。砌完邵伯湖石隄長一千八百九十八丈八尺。內創新砌石長一千二百八十五丈五尺。拆砌舊石六百一十三丈三尺。各高九尺至一丈一二尺。計石十層十一十二層不等。其餘修補舊隄。不敢算工。築完寶應西土隄長三千六百三十五丈。內椿筴工長二千八百三十七丈。土工長七百九十八丈。俱低濶一丈三四五尺。頂濶八九尺一丈。高五六七尺不等。寶應縣知縣耿隨龍管砌完界首三里湖石隄長八百四十丈。高郵州知州楊汝濂管砌完該州南北小湖口石隄共長三百九十丈。磚石相兼。各高九尺至一丈一二尺不等。淮安府同知姜桂芳揚州府同知張文運通判劉汝大江都縣知縣劉道隆儀真縣知縣趙廷杞清河縣縣丞關大倫等。築過裏河東西東水椿筴土隄共長三百二十丈。底濶六七尺。頂濶四五尺。

不等。俱高五尺。幫築過鹽壩。迤南隄岸長六十一丈。濶二三丈。高五六尺不等。挑濬河身淤淺。自清河口起至爪儀江口止。共長四千四百一十三丈九尺。面濶三四丈至十五六丈。深三四尺不等。

總管官南河郎中羅用敬。徐州兵河僉事。今陞漕儲道參議陳文燧。督同淮安府同知姜桂芳。修補完高堰石隄長三千一百一十丈。幫完土隄長七千七百九十二丈。椿筴工長一千五百四十四丈。挑濬完堰內洩水支河長二千一百五十五丈。築完天妃壩裏口長一十八丈。外口長三十二丈。清江浦外隄草埽排椿長四百八丈。草壩四座。砌完惠濟祠外河石隄長五十四丈五尺。高十六層。草壩一座。裏河石隄長四十四丈。高十三層。祠西包石長四十二丈。禮字壩土隄長三百四十九丈。石隄取直止一百六十四丈。高一十五層。范家口土隄長四百五十丈。幫完副壩一道。長二百七十丈。排椿二道。共長六百九十六丈。自水底築高三丈四五尺。底濶十丈四尺。面濶五丈五六尺。砌完石隄長三百三十丈。高十九二十層不等。築完順水草壩九座。石磯幫一座。濬完澗河長四千九十丈。引水溝長一百九十五丈。幫完柳浦灣潘家壩椿筴隄長二百二十八丈一尺。張家窪土隄長二百九十一丈。喻口河壩一道。馬家湖椿筴工長一百八十丈。黑墩工長十丈。崩家窪土隄長一百丈。金家窪土隄長

二百丈。賈家窪土隄長一百九十丈。俱底闊一丈三尺。頂濶五尺。高八尺。建完柳浦灣料廠一所。

總管官中河郎中沈修。徐州兵河按察使陳瑛。督同淮安府同知姜桂芳。清河縣署印本府通判田有年等。塞完清河縣南岸張福決口。長一百二丈。加築隄長一百二丈。底闊六丈。頂闊二丈五尺。高八尺五寸。兩頭并中段俱護埽排椿。長闊不等。接築張福口以東新隄。長四百四十一丈。根闊六丈。頂闊二丈。高一丈。北面啟築斜坡。闊六尺。南面護捲土牛磯。長闊不等。加築戚書口坡隄。長一十九丈。闊三丈五尺。高四尺五寸。修築完張福口以南椿筴土隄。長七十七丈五尺。築完張福口以西新隄。長三百三十丈。根闊三丈五尺。頂闊一丈五尺。高六尺。幫築完王家口舊隄。長一千一百八十丈。根闊二丈一尺。至七八尺不等。頂闊一丈五尺。至三五尺不等。高六尺至九尺一丈不等。內用蘆筴草埽廂護。共長一千三百五十四丈。

總管官中河郎中沈修。夏鎮任滿。主事楊信接管。主事余繼善。徐州兵備陞任僉事陳文燧。接管按察使陳瑛。督同淮安府同知徐伸。徐州知州唐民敏等。砌完鎮口閘一座。計石三十層。高三丈一尺四。鷹翅各砌石三十層。閘窩四角廂護椿埽。各長七丈。挑完本閘新開河道。

北首長八十丈。南首長一百三十六丈。築完塔山縷隄。長九百四十二丈。底闊四丈。頂闊一丈二尺。高一丈。增砌完古洪內華二閘。各加石四層。并加鴈翅石各五層。

總管官潁州道兵備副使楊芳。督同盱眙縣知縣吳萬全。泗州守備丁汝謙等。砌完護陵子隄。除先築攔河月壩長二百八十二丈不算外。實砌石工長二百九十二丈五尺。高四尺。根闊三尺。

### 山東工程

總管官北河郎中吳之龍。督同兗州府同知陳昌言。東昌府通判田野。臣汝上。縣知縣劉漢書。聊城縣知縣韓子廉等。築完馬踏湖土隄。自弘仁橋起至禹王廟後止。長三千三百一十三丈。根闊二丈五尺。頂闊八尺。高六尺。何家口建滾水石壩一座。砌完壩身連鴈翅轉角壩頭共長三十一丈四尺。壩身高四尺。兩頭各高九尺。建完梭隄迤南永通閘一座。高一丈九尺五寸。閘底長七丈。闊四丈四。鴈翅每長二丈。闊一丈五尺。續議修補完房家口石隄長四丈。高一丈。闊二尺。築完弘仁橋河口一處。

總管官南旺任滿主事蕭雍。接管主事王元命。督同兗州府同知陳昌言。東平州知州徐銘

汶上縣知縣劉漢書濟寧衛指揮文棟濟寧州同知程子洛築完蜀山湖舊隄自馮家壩東起至蘇魯橋止長三千五百一十丈根闊二丈五尺頂闊七尺五寸高七尺五寸外又填完蘇家等十一處水口各長一丈四五尺闊二丈三丈二三尺深七八尺一丈不等建完坎河口滾水石壩一座連鴈翅長六十二丈八尺壩面闊一丈五尺底闊一丈八尺高三尺鴈翅各闊三丈高一丈北頭接築土隄七十丈南頭二百二十五丈俱根闊四丈二尺頂闊三丈迎水處所灰石壘砌建完馮家滾水石壩一座長十丈面闊一丈五尺底闊二丈高四尺自蘇家橋起至田家樓止長一千四百七十一丈八尺納水處所每丈栽柳三株共栽完封界柳四千四百一十五株

總管官濟寧兵河按察使曹子朝督同兗州府同知羅大奎鉅野縣知縣殷汝孝濟寧衛指揮文棟修完馬場湖東面舊隄并築新隄共長一千六百二十丈根闊一丈四尺頂闊六尺高六尺建完火頭灣通濟閘一座閘底砌石長闊各八丈計石一十三層高一丈七尺七寸上兩鴈翅各長三丈五尺下兩鴈翅各長四丈五尺閘下接砌鴈翅兩邊各長三丈閘上接砌鴈翅兩邊各長二丈五尺又開挑河身南北共長八十四丈闊十六丈深二丈五尺修完安居斗門一座四鴈翅各接砌新石長一丈高一丈十里舖斗門一座四鴈翅各接砌新石

長五尺高一丈五里營斗門一座南二鴈翅各接砌新石長一丈北二雁翅各接砌新石長五尺俱高一丈栽完護隄臥柳一萬六千一百五十株北面原留入水渠道栽完封界高柳一千六百五十六株

總管官分守東兗道左參政郝維喬督同兗州府同知陳昌言汶上縣知縣劉漢書築完南旺湖東面子隄長七千一百八十八丈三尺根闊一丈頂闊五尺高六尺西南北三面幫築完舊隄長一萬二千六百丈根闊二丈五六七八尺高六七尺不等挑完順水溝渠長一千一百七十四丈六尺口闊一丈二尺七八尺底闊一丈三五尺不等修補完關家大閘兩金門并兩鴈翅各長十一丈濶各八丈高一丈五尺常明孫強劉家焦纒濟運閘共斗門五座每座兩金門并兩鴈翅各長三丈五尺濶各二丈五尺各高八九尺不等又剏砌完盛進張全斗門二座每座兩金門連兩鴈翅各長六丈濶各二丈五尺各高八九尺不等五里舖剏築完滾水石壩一座長五丈兩壩頭各濶一丈五尺迎水兩鴈翅各長一丈二尺兩轉角各長一丈跌水兩鴈翅各長九尺五寸兩轉角各長五尺

總管官分巡兗州道陞任僉事劉弘道接管僉事和震督同兗州府通判王心東平州知州徐銘築完安山湖土隄長四千三百二十丈根濶一丈一尺頂濶六尺高七尺建完八里灣

閘一座。閘身連鴈翅共長十丈。金門濶一丈三寸。高一丈一尺。建完似蛇溝閘一座。閘身連鴈共翅長十丈。金門濶一丈三寸。高一丈。奉聖旨。工部知道。

### 贈卹司官疏

臣潘季馴謹題。爲乞恩贈卹病故勤事司官。以慰幽魂。以勵人心事。據中河郎中沈修清江浦管閘員外郎黃曰謹徐州兵河按察使陳瑛海防兵備副使周夢暘漕儲道左參議陳文燧會呈。據高郵州申報南河工部郎中羅用敬。因積勞感患喉疾。於三月初八日身故。乞念本司河工勞績最多。艱辛備至。照例請卹等因。據此。職等查得南河分司工部郎中羅用敬。江西南昌縣人。由進士初任烏程縣知縣。行取赴部。陞刑部主事。漕運理刑。萬曆十三年八月內督修寶應越河工完。陞本部員外郎。十四年七月陞工部都水司郎中。管理南河各工。修補過高堰石隄三千一百一十丈。幫築土隄七千七百九十二丈。椿筴工一千五百四十四丈。挑濬堰內支河二千一百五十五丈。寒築天妃壩裏外共長五十丈。清江浦草埽排椿四百八丈。草壩四座。惠濟祠外河石隄五十四丈五尺。草壩一座。裏河石隄四十四丈。祠西包石四十二丈。禮字壩土隄三百四十九丈。石隄一百六十四丈。范家口土隄四百五十丈。副壩長二百七十丈。排椿



長六百九十六丈。石隄三百三十丈。草壩九座。石磯嘴一座。挑濬澗河四千九十丈。引水溝一百九十五丈。柳浦灣張家窪等處土隄。椿筴共長一千一百九十八丈二尺。并建物料廠一所。築過鹽壩迤南隄岸長六十一丈。挑濬淮揚運河北自清河口南至瓜儀共長四千四百一十三丈九尺。築過裏河東西水椿筴土隄共長三百二十丈。修砌界首三里湖石隄長八百四十丈。高郵州南北小湖口石隄共長三百九十丈。寶應西土隄二十里。俱經報完。邵伯石隄二十里。修砌將完。正在報竣。其各處歲修工程。隨地幫築者。不可勝紀。積勞之後。致感喉疾。身故。爲照本官經濟練才。膚敏素抱。始以寶應功成。薦擢水部。因而南河受事。值際河艱。荒度三年。歷寒暑而曾無厭怠。拮据萬狀。雖纖細而必自身親。淮揚修守。若范壩若高堰。頭緒奚啻千端。土石隄防。若欽工若歲工。延袤殆將百里。工已報竣。人即云亡。蓋平生精力。殫於胼胝。而一念艱貞。比之金石。宦囊淡薄。衾斂無以爲資。旅櫬淒涼。迨路爲之惻。所謂鞠躬盡瘁。死而後已者。於本官真無媿矣。即今旦夕報功。已在首叙之列。豈可勤勞死事。寂無優卹之酬。及查萬曆九年中。河郎中余毅中。在任病故。該部院題奉明旨。加贈太常寺卿。今郎中羅用敬。工程勞績。委與余毅中事例相同。合無請乞本院俯賜會題。特加贈典。庶幽魂永慰於地下。而人心激勵於將來。等因。到臣該臣會同總督漕撫戶部右侍郎兼都察院右僉都御史舒應龍。照得原任

工部都水司南河郎中羅用敬。秉心忠赤。敷治精明。出宰菰城。遺思尙在。明刑淮甸。平反有聲。改任南河之官。正當弛防之日。范家口之隄未固。天妃壩之決復仍。東支西吾。此顧彼失。敝歷三年之久。曾無片刻之休。延袤千里之間。寧有不遍之足。舊工未艾。新役復興。濬淺培卑。種種皆其料理。鳩工集事。紛紛多所取裁。朝于斯。暮于斯。飲食起居于斯。已絕生人之樂。寒不息。暑不息。烈風暴雨不息。常懷殉國之心。以故河湖夾攻之地。並無一隙之虞。築濬兼舉之秋。能獲萬全之策。形神俱敝。智力兩窮。寸心如焚。諸火並發。積成喉病。有及宜矣。又聞本官未死之二日。猶扶疾遍歷諸工。口不能言。惟以手指。醫人立勸歸署。就榻即仆。古人所謂鞠躬盡瘁。死而後已者。非其人哉。身死之後。囊無餘資。臣等與地方諸寮。曲爲捐助。始就棺殮。又可知其生平矣。興言及此。不覺淚下。身在固當優叙。歿後尤宜厚卹。所據司道查有原任工部郎中余毅中事例。曲爲申懇。似宜允從。伏望敕下該部。再加查議。如果臣等所言不謬。具疏覆請。從厚優卹。河臣幸甚。臣等再照天下之事。勞心以治人者。其力或可少憩。勞力以治於人者。其心尙有餘閒。維茲河工。必須心力兩盡。方克有濟。故雖以大禹之智。猶不免於手足胼胝也。十年之內。但經河工大舉。必有殉身之臣。兩淮運同贈行太僕寺少卿黃清。中河郎中余毅中。山東參政馮敏功。徐州道副使莫與齊。河南僉事余希周。南河郎中羅用敬。相繼客死工所。臣等皆所目擊。

而其他卑官散秩。泯沒無聞者。未可悉數。故近來大小諸臣。視河官如桎梏。偶得脫免。若釋重負。如蒙皇上俯賜矜憐。曲爲優處。卹旣死者於身後。鼓見任者於生前。亦礪世磨鈍之一機也。臣等不勝惶悚懇祈之至。謹題請旨。奉聖旨。該部知道。該吏部議覆。奉聖旨。羅用敬准贈太僕寺少卿。

河防一覽卷之十二

【奏疏】

甄別司道疏

臣潘季馴謹題爲欽遵明旨甄別司道官員以重河漕事案照萬曆十六年十一月內准工部咨該臣題爲恭誦綸音不勝感奮敬陳治河鄙見伏候宸斷事覆奉聖旨是近年河道官員不行遵守修防事宜因循廢弛致有疎虞却又紛紛建議意見雜出何裨實事今後務遵明旨加謹防禦每年終總河官將所屬河道部司等官甄別具奏欽此除欽遵外臣竊惟南北運道不啻三千餘里總河之臣以一身彈壓于其間豈能家喻而戶曉日省而月視哉所賴于承宣者司道諸臣也司道不得其人則河情難于上達法禁苦于下壅鮮不誤矣我皇上留心國計軫念民生特降明綸諭以得人爲要仍頒嚴旨假以甄別之權此實地方之福河臣之幸也敢不仰承德意悉心諮訪以圖報稱哉臣查得自北直隸以至浙江專管河道者部臣伍道臣貳兼管河道者部臣叁道臣拾壹今當萬曆十七年已終相應奉旨甄別內除蒞任方新伏秋修防

未經委任。及浙江水道係臣原籍。恐違近例。不敢概舉外。以部臣言之。如中河分司郎中沈修。虛中雅能。受善廣益。出自和衷。不假聲色。而推赤心。以鼓羣工。罔炫新奇。而順水道。以收羣策。北河分司郎中吳之龍。直諒固是本真。敷施尤多諳練。勿喜更張。而因革自有條理。無爲苛刻。而章程具見整嚴。南河分司郎中黃曰謹。勤恪足應糾紛。老成不事粉飾。始任即值橫流。而疏濬獨苦。施工必勤。荒度而防禦有方。臨清板閘分司員外何應奇。性不狗人。政能剔蠹。司甄司閘。而遇事皆有規條。任怨任勞。而一心惟知法紀。南旺分司主事王元命。卓有古雅之風。絕無脂韋之態。言若不出。而泉閘庶務聿興。體若不勝。而官夫奉行惟謹。夏鎮分司主事余繼善。通敏可當一面。才謂克濟時艱。濁流四溢。而兩月悉就安全。諸作並興。而一身不遺餘力。以道臣言之。如徐州道山東按察使陳瑛。胼胝已及十年。忠勞真如一日。胸抱全河。而區裁有同指掌。志專報主。而注厝不異承蜩。分守東兗道管泉參政郝維喬。涵養定而吐茹不形。器識高而張弛自裕。導泉防河之曲當。澤民利國以咸宜。分守濟南道管泉參政楊芳。秉長駕遠馭之才。有憂勤惕厲之意。釐析河泉之源委。而譬畫甚當。稽查額課之逋負。而工費允資。河南管河道副使陳九仞。精勤率屬。而事在先勞。縝密分猷。而言可底績。禦狂瀾一身如棄。躬舂錘萬苦不辭。濟甯管河道副使曹時聘。心事如青天白日。才華若流水行雲。昔守鳳郡。而防淮之譽已彰。

茲擢東藩而治河之功尤茂。蘇松兵備道副使李涑才可斷犀。智能先物。當庶務旁午之日。而疏鑿必親。值天時旱魃之秋。而閭閻允附。大名兵備道副使于文熙。卓犖不事詭隨。誠確雅能。肩仔疏淪衛水。而王舟無阻滯之患。議建隄防。而魏民有保彰之功。霸州兵備道副使蔣科才猷不尙揮霍。趣向自是高明。流沙之通澀不常。運渠之疏築知謹。以上諸臣。職任雖有不同。要之公廉勤恪。皆爲一時之選。所當薦揚者也。內如郎中黃曰謹。蒞事雖僅九月。修防已畢一年。按察使陳瑛。副使陳九仞。近報陞任。尙未交代。參政楊芳。副使曹時聘。見任雖未及期。前官俱兼河務。皆臣所轄之地。似應并薦者也。如蒙敕下該部。再加查議。如果臣言不謬。將諸臣次第轉擢。而中間相應久任者。查照原題施行。庶幾防禦得人。而地方永賴矣。謹題請旨。奉聖旨。該部知道。

### 工部覆前疏

題爲欽遵明旨。甄別河道官員。以重河漕事。該總理河道右都御史潘季馴題前事。奉聖旨。該部知道。欽此。該部看得總理河道右都御史潘季馴題稱。自北直隸以至浙江。專管及兼管河道部司諸臣。除浙江係河臣原籍。恐違近例。不敢概舉。乞將中河郎中等官沈修等。徐州道按

察使等官陳瑛等次第轉擢中間相應久任者查照原題施行一節爲照漕河事規分理防守固在郡縣承宣督率尤賴部司乃往歲薦獎獨及郡縣而部司不與甚非所以重綜覈昭勸懲也近該河臣題奉明旨通行甄別茲當十七年歲終照例具題前來相應如議題請恭候命下咨行吏部將部臣沈修吳之龍黃曰謹何應奇王元命余繼善道臣陳瑛郝維喬楊芳陳九仞曹時聘李淶于文熙蔣科通行紀錄次第轉擢內郎中沈修查照原題久任候九年考滿另議撥擢及照蘇松兵備係暫管河務彼江南水利旣設有專官今後年終仍查水利官舉劾其浙江水利據河臣稱係原籍遵例不敢概叙但查近例原籍迴避特爲南道御史點差而設若都御史統轄地方廣遠原不在此例如各邊及漕運總督有所舉刺雖原籍亦所不遺總理河道與總督體統相同則事權不宜獨異况全河形勢南自兩浙歷江河淮濟以達京師凡數千里若一身之脈絡然倘偏而不舉則脈絡不得貫通事權不得歸一合無今後每年終查覈各司道府州縣如南北兩直隸浙江河南山東凡與河道相干涉者無論原籍與否一體舉劾併乞聖裁移咨總理河道及南北直隸浙江河南山東各巡撫都御史及咨都察院轉行各巡按御史遵照施行奉聖旨是各該司道等官但與河道相干的着總理官一體甄別

## 申飭鮮船疏

臣潘季馴謹題。爲乞恩查復舊規。以利漕渠事。據管理南河郎中黃曰謹呈前事。卷查舊例。淮安通濟閘外。每年伏水未發之前。築攔河土壩。以遏黃流內灌。所有進貢鱗魚鮮船。限在五月。初發行。伏前過淮。其楊梅等船。聽將馬快空船。預撥壩外。停泊盤剝。節經遵行已久。及照上年。前船。俱不預先出口。以致築壩過期。黃水暴漲。倒灌裏河淤墊。挑濬甚爲不便。近來黃河漲發。多在未入伏二十日之前。勢猛難禦。則口壩之築。須爲早圖。合無移文南京兵部。并守備衙門。速將鮮貢船隻。催償發行。并撥馬快船隻。依期於五月中旬。俱令出口。本司預備物料。定於六月初一日。築壩合口。庶壩工早竣。河道無虞等因。到臣。案照萬曆八年。先該臣總理河漕。曾同漕撫前任都御史江一麟。題該工部覆議。查得正德嘉靖年間。五月已有鱗魚到京。且既稱鮮品。尤宜早進。既係薦順。尤該及時。但近年以來。進鮮每於採鮮既完之後。方行措辦裝具。附載貨物。勾當稽留。動踰旬日。沿途淹頓。又致愆期。比至京師。則色味俱變。不惟有礙築壩。且於薦鮮之義。亦甚無當也。即據守臣回稱。鱗魚例在五月初旬採完。蓋四月二十日前後。已行採矣。若隨船器用。如冰鹽之類。預備停當。一經採完。即便發行。不過半月。即可過淮。正是伏前。自於



築壩無礙。至於楊梅等物。又與鱗魚不同。即至壩成。不妨盤剝。以後年分。鱗魚鮮船。定限五月初頭發行。伏前過淮。楊梅等船。從便聽將南京馬快空船。於未築壩之先。預撥過淮。停泊壩外。以俟盤剝。則上供既無後時之虞。國計亦得先事之備。所關於築壩治漕者。實非小補等因。題奉聖旨。是欽此。備咨通行。欽遵外。今據該司所呈。近來黃河水發太早。即如去歲五月二十日。水汛陡漲。其流愈濁。馬船到遲。致誤築壩。畏河受淤。挑濬工鉅。乞要預催鮮船早放出口一節。委屬喫緊。臣又查得徐北鎮口。閘外清黃交接。黃河暴漲。內灌成淤。已經題奉欽依。黃漲之時。下板閉閘。以防內淤。若貢艘少遲。南誤出口。北誤入閘。兩相妨礙。况鱗魚出在四月。自應及時採取。若船隻冰鹽。預先備辦。採完即發。則半月之內。准可過淮出口。非惟壩工不誤。而恭進品物。較常必更鮮美。今據該司擬于六月初一日築壩。似爲長便。伏望皇上軫念河漕。薦新均屬重務。敕下該部。如果臣言不謬。咨行南京兵部及內守備衙門。預將鱗魚鮮船合用器具冰鹽。先時料理完備。一經採完。隨即督發。嚴諭在途不許遷延。期在五月十五左右。兩運盡數過淮。趁起伏水未發。早進鎮口。閘河其餘貢船。預撥馬快空船。照限出口。停泊外河。以俟盤剝。仍聽臣預行該司辦完壩料。將通濟閘外輓壩。準在六月初一日合口。庶幾貢期不爽。河防有裨矣。謹題請旨。奉聖旨。該部知道。

## 工部覆前疏

題爲乞恩查復舊規以利漕渠事。該總理河漕兼提督軍務都察院右都御史潘季馴題前事。奉聖旨。該部知道。欽此。欽遵。抄出到部。送司案呈到部。看得淮安通濟閘徐州鎮口閘。當黃河南北之衝。故每年五月間黃水未發。將鮮貢船隻催償過盡。南則築輓壩以遏橫流。北則閉閘。口以禦淤墊。屢經題奉明旨。禁例森嚴。遵行已久。乃近年鮮船未行之前。則器具冰鹽。失于先治。既發之後。則附載貨物。沿途遷延。如上年黃水陡發太早。鮮船出口太遲。遂致築壩不前。幾成大患。是以河臣潘季馴先事預防。申明舊制。要在四月採鮮。五月過淮。六月初一日築壩。較之往年稍加督速。而貢品愈致鮮美。開壩俱得蚤圖。深爲長便。相應如議。覆請。但進鮮船與官民船不同。法禁難行。事多阻撓。自非天語丁寧。未免遷延如故。伏望皇上俯念軍國大計。將鮮貢限期。特降嚴旨。容臣等咨行兵部轉咨南京兵部及守備衙門。務要依期採辦。作速啓行。限在五月十五日前後兩運盡數過淮入口。但有稽遲。至六月內者。許河臣參奏重處。仍咨總河都御史轉行管理南河郎中夏鎮主事預辦物料。候鮮船過淮。即便築壩。過徐即便下閘。其輓壩定限每年六月初一日合口。如有遲誤。一體查參施行。奉聖旨。是進鮮船隻。着該衙門依期

採辦發行限五月中過淮六月初築壩不許延緩過期致礙河防如有故違聽總河官及該科參治

### 申明職掌疏

臣潘季馴謹題爲明職掌一事權以便責成以裨河漕事臣於二月十二日准工部咨該臣題爲欽遵明旨甄別司行官員以重河漕事本部覆議內開蘇松兵備係暫管河務彼江南水利既設有專官今後年終仍查水利官舉劾其浙江水利河臣稱係原籍不敢概叙但查各邊及漕運總督有所舉劾雖原籍亦所不遺總理河道與總督體統相同則事權不宜獨異年終查覈司道府州縣如南北兩直隸浙江河南山東凡與河道相干涉者無論原籍與否一體舉劾等因題奉聖旨是各該司道等官但與河道相干的着總理官一體甄別欽此除欽遵外臣謹以今歲甄別之疏不及蘇松水利道之故與兵水二道事體應否歸一之由敬爲皇上陳之臣於萬曆十六年六月初二日入境適值添設蘇松水利一道副使許應達隨亦赴任臣以事體度之漕渠必屬之水利道矣隨於本年閏六月初八日爲查取官員賢否事牌行該道查造文武官員考語冊又爲專責成嚴修守等事案行該道申飭河防初九日爲欽奉敕諭查勘河道

等事。牌行該道查議。濬淺築隄錢糧人夫作何區處。七月初一日准工部咨爲民饑已極。西成尙遠等事。案行該道將南京戶部發銀十萬兩。如遇修舉水利。呈允支銷。年終將支過實存數目。報院覆查咨部。初二日爲關防詐僞事。票行該道。將發去告示轉行所屬曉諭。十八日爲查濬江南河道以便早運事。案行該道查勘運河某處淺阻。作河疏濬。并額徵河工脚米銀完欠數目。二十九日爲查理歲報河道工程事。牌行該道查取萬曆十六年修過工程。用過錢糧。年終冊送院類造。該道俱無一字回報。而水利道事務亦無一字關白。臣者隨該臣咨行應天巡撫周繼。查詢管河該道緣由。准有回咨。內開先據蘇松兵備道呈稱河道事宜。先年并水利俱係兵備道兼理。今既設有水利專道。則河道一事應否歸於水利道專管。或仍聽本道兼攝。呈蒙本院詳批。河道水利原係二事。仰照舊行去後。今准前因。相應咨覆等因。臣遂以河道事務一意責成蘇松兵備道。而水利道之事。絕無干涉矣。此非許應達之有心抗臣。亦以河道原屬兵備道。而謂臣職專河道。水利非所司耳。故臣於年終甄別司道之疏。止及李涑。而不及許應達也。即今奉有明旨。無容別議。但於職掌尙未申明。事權亦未歸一。且水利道原無管河之責。而臣乃舉刺非所管轄之官。若於事體未安者。臣查得江南水利河道委屬兩端。而副使許應達才猷敏練。智識通明。先仕南河郎中。河事固所素習。河道事宜應否併屬本官兼理。其水利

事務自有撫按專司。應否亦屬河道衙門兼攝。臣不敢擅擬。再照浙江司道府縣掌印水利等官。工部覆奉明旨。令臣照各邊及漕運總督事例。無論原籍與否。一體舉劾。行間續准吏部咨。該本部覆臣年終舉劾有司官員。內開浙江司道有司玩愒不職失誤河防者。許令臣據實開報。彼處撫按參奏等因。兩咨事體未一。有礙遵行。伏望敕下該部。通行查議。其蘇松水利。惟復轉行彼處撫按衙門。再加詳酌。覆請明旨。着爲成例。以便永遵。庶職掌明而舉劾自當。事體定而責成亦易矣。臣愚幸甚。河道幸甚。謹題請旨。奉聖旨。工部知道。

### 工部覆前疏

題爲明職掌一事權。以便責成。以裨河漕事。該總理河道右都御史潘季馴題前事。奉聖旨。工部知道。欽此。欽遵。抄出到部。送司案查。本年二月內。該總理河道右都御史潘季馴題爲。欽遵明旨。甄別司道官員。以重河漕事。內題議北直以至浙江專管及兼管河道部司諸臣。除浙江係河臣原籍。恐違近例。不敢概舉。乞將中河郎中等官沈修等。徐州道按察使等官陳瑛次第轉擢等因。具題前來。已該本部查得蘇松兵備道副使李淶。暫管河務。彼江南水利。旣設有專官。今後年終。仍查水利官舉劾。其各司道府州縣官。如南北兩直隸河南山東。凡與河道相干。

涉者。無論原籍與否。一體舉劾。緣由覆奉聖旨。是各該司道等官。但與河道相干的。着總理官一體甄別。欽此。已經咨行吏部及備行順天保定鳳陽應天浙江河南山東各撫按衙門一體欽遵。訖。今該前因。似應覆請。案呈到部。看得河道都御史潘季馴所題。大約謂漕河應屬水利。屢經移文蘇松水利道查議漕河事宜。不報。續准應天巡撫咨稱河道水利原係兩事。河道係兵備。李涑兼攝水利。係許應達管理。故年終叙錄。止及兵道。而不及水道。即今漕河水利。應否歸一。要行彼處撫按詳酌。覆請著爲定例。其浙江水利等官。該工部覆奉明旨。許總理河臣一體舉劾。又准吏部咨開浙江司道有司失誤河防者。河臣開報彼處撫按衙門參奏。兩咨事體有礙。乞要通行查議各一節。爲照蘇松添設水利副使。一應江南水利。皆其職掌。而况漕河上裨國儲。下切農事。尤水利之重。且要者乎。十六年水道初設。尙未履任。該撫臣以江南旱荒。亟欲借水利以濟饑民。諸凡修濬事宜。暫令兵備副使李涑兼攝。正而舉行。一面候新官至日交代。誠得救荒權宜之策。及水道既至。業有專責。則漕河事務。自應接管。若復歸之兵道。恐非朝廷設官分職之意。况水利近兼督糧。每年押運水次。則漕尤其緊關。疏濬豈宜別委。此後河道年終。仍當查水利道舉劾。至于各省直水利官。凡與河道相干涉者。既奉明旨。許總河一體甄別。則浙江雖係河臣原籍。其司道有司。苟誤河防。自當論劾。似不必開報彼處撫按參奏。此兩

事者一關職掌。一關事權。職掌不明。何以盡官守。事權不一。何以昭勸懲。河臣詳具本末。特爲申明。委應如議。覆請。恭候命下。備咨總理河道。應天巡撫。都御史。及咨都察院。轉行蘇松巡按。御史。督行蘇松水利道。將漕河。即使管理。以後興修水利。做過工程。用過錢糧。凡關係農務者。照舊開呈。彼處撫按衙門。奏報。關係漕河者。呈報總河衙門。以憑甄別。仍呈彼處撫按。知會。至于浙江。司道府縣。掌印水利等官。既奉有明旨。許河臣一體甄別。仍應欽遵施行。無容別議。奉聖旨。是水利道有關漕河的。着遵照近旨。通行甄別。

### 縣官輕忽河務疏

臣潘季馴謹題。爲縣官輕忽河務。重累小民。乞恩俯賜究治。仍乞申飭成例。以安地方。以裨河防事。據管理中河郎中沈修。徐州兵備副使陳文燧。曾呈蒙。臣憲牌內開。各屬領銀買辦蘆柳。椿櫟等料。除邳州。遵行差官收買將完。與民無干外。該司道。即查睢寧縣。因何不差職官買運。派令鄉民。致生騷擾。究明呈詳。其徐靈。宿三州縣。見今作何收買。曾否累民。併查議報。依蒙行據。淮安府管河同知唐民敏。呈稱。本職親詣睢寧縣。查得該縣。先領銀一千五百兩。分派各社。殷實。薛槃等。前去產料地方收買。已完。見今運廠交收。續領銀一千兩。又分派各社。殷實。劉仲

弼等轉派花戶職已出示曉諭原買人役各將原領銀兩查照原派各料已買完者仍令交厥其未領銀兩俱委佐貳職官買解不許累民及查徐州領過銀兩已發所屬四縣差委沛縣典史朱大積等宿遷縣已委典史陳一揚等各前去安東等處買運惟靈璧縣盡派概縣小民該職親詣查理行至雙溝地方據各買料人役執稱買到料物俱被收料委官凌錫刁難使費守候日久隨拘本犯審實搜得索受人戶蔣連等贓銀共六兩一錢九分票發縣丞楊田收貯本犯行縣監候外參看得睢寧縣原估埽料派及殷實義民買解而殷實轉派花戶動衆滋怨至於靈璧縣違背原行盡派花戶民已不勝其苦及買到交納又被委官百計刁難索騙不貲誤工病民莫有甚于此者法難輕貸合無請乞裁奪緣由到職該職等勘得河工辦料責成掌印官原係節年題准事例今歲工料已經估計呈請本院并漕撫部院詳允備行州縣着落掌印官領銀選委廉幹職官查照上緊買辦交厥除邳徐宿遷遵照外惟睢寧縣派之里甲殷實而殷實轉派之花戶靈璧縣則徑派里甲騷擾小民且縱容義官索騙不惟墮工抑且累民似應呈請定奪等因到臣卷查先該臣題爲申明修守事宜以圖永賴事款開預定工料以便工作每歲十一月中旬司道踏勘沿河險夷分爲三等類報總理衙門批允分撥應辦物料即行各掌印官領銀如數買辦定限正月半以前報完隨即興工四月初旬告竣著爲成規違誤參究



已經工部覆奉欽依通行欽遵在卷。續于去年十一月二十一日據司道呈爲會計預備十八年歲修工料事。議得徐邳靈睢宿五州縣遙縷二隄迎溜掃灣捲埽幫護。合用椿草蘆柳繩絲等料。該銀一萬三千六百四十七兩二錢一分。動支淮庫歲修銀。轉發各州縣掌印官選委廉幹職官。查照原估。趁時置買。交廠驗足。聽於正月初旬興工支用。已經批允通行。訖。臣又恐缺料誤工。派民生事。又於正月初二日牌行各州縣。將支過銀兩。責差的當員役。四散收買。解廠交納。向未回報。臣隨於正月十九日親詣徐邳一帶查理。止據邳州揭報收買將完。其餘州縣屢經催促。並無解到。該臣往來河濱。詢之小民。始知睢甯縣故違原行。並無差官買運。及至興工。方纔派及殷實。攀連申遞。其徐州靈璧宿遷等三處。恐亦類此。即牌行司道查究去後。今據前因。臣竊惟治河之法。莫要於歲修。而歲修之工。必資於草料。草料不預。則工作必遲。而伏秋之間。難保無虞矣。臣是以題請。十一月中旬勘估買料。正月半以前報完興工。四月初旬告竣。三令五申。極爲詳勉。而又恐其派累小民。耽延時日。復與司道叮嚀告戒。不曰責差的當員役。四散收買。則曰選委廉幹職官。上緊買辦。可謂至諄懇矣。而靈睢二縣。不恤民隱。惟便己私。揆厥所由。蓋因積胥黠吏。意在侵扣。差官收買。便難染指。以至義官凌錫。大事誅求。即搜出者如此。而其花費者可知矣。即義民官如此。而吏書可知矣。等而上之。又安知掌印官之無所私乎。

今時及三月。諸料未備。歲修之工。必難早竣。不惟小民負累。而於河防之事。墮誤多矣。既經司道勘覈前來。相應參治。參照睢甯縣知縣馮紹京。靈璧縣署印縣丞董本才。既昏庸。志多怠肆。視貧民如秦越。全無已溺已饑之懷。視河務若贅疣。甯有急公趨事之義。聽羣小之撥置。而上官。令若罔聞。知任精棍之憑陵。而小民咨怨。了無動念。徇私之弊。難保必無。而違玩之愆。已屬難道。我皇上洞悉民艱。特垂蠲賑。留神國計。宵旰勤慘。而紹京等乃敢玩愒如此。非惟有乖人臣之義。而亦大失民牧之職矣。伏望敕下該部。再加查議。將馮紹京董本併一千吏書及賊犯凌錫等。行臣提問。依律議擬。官吏如有贓私。從重究治。庶人心知警。而河工自肅矣。再照歲修之工。每歲必不可已者。若不再加申飭。著爲定例。日久官吏未免弛惰。併望特降嚴旨。每歲十一月中旬。各掌印官赴司道官處。關支銀兩。將應辦物料。責差的當員役。於出產地方。分投收買。定限正月。以裏報完。並不許派及小民。致滋騷擾。如有仍前抗違。許總理衙門。指名參究。則地方既得安堵。而修防亦可預辦矣。謹題請旨。奉聖旨。馮紹京等。着河道衙門。提了問。工部知道。

### 旱久泉微禱雨疏

臣潘季馴謹題。爲旱久泉微。河道艱澀。乞恩俯允虔禱。以回天變。以濟糧運事。據管理北河郎中李民質管泉兼理南旺濟甯閘座主事王元命濟甯管河兵備副使曹時聘會呈。據兗州府管河運司同知陳昌言報稱。自去冬至今。天道亢暘。汝洄泉流微細。以致南旺等處河道日澀。即今重運盛行。恐有阻滯。預呈到職。該職等看得南旺濟甯一帶。漕河地勢高亢。不通江河。所賴以濟運者。惟藉諸泉之水。而諸泉之水。必得天雨及時。源流充溢。斯可盈漕利涉。詎自去冬至今。雨澤未霑。天道亢旱。時已入夏。地脈益乾。泉流愈涸。以涓滴有限之水。充南北二河之用。勢必不能。今濬河則河身不淺。導泉則泉穴俱闕。多方疏引。水涸如故。人力至此。無可奈何。所仰望者。惟有雨耳。乃雲作風隨。須臾如掃。日復一日。膏澤竟屯。雖今歲糧艘不多。積有諸湖之水。儘可接濟。但目下過濟者。止有江北運船。江南重運。及淮貢船隻。尙多未到。茲值狂風捲瀉。烈日薰蒸。湖水雖盈。亦漸消耗。倘自今猶然不雨。接濟不前。殊爲可慮。查得萬曆十六年久旱河淺。該查勘河工都給事中常居敬山東巡撫李戴曾題請禱。奉有明旨。隨即霖雨滂沱。運艘利涉。即今旱魃爲虐。不異往歲。河水漸涸。後事可虞。除行管河泉閘等官。加謹啓閉。極力疏濬。職等日夜驚皇。痛自修省外。合無比照前例。俯賜題請。恭行祈禱。于泰山諸神。庶幾天意可回。甘霖早澍。國儲幸甚。河道幸甚。等因。到臣。臣竊惟漕河之深淺。係于泉源之盛衰。而泉源之盛

衰係于雨澤之多寡。蓋天時地利。本自相資。而人力天工。不可偏廢者也。矧漕渠自鎮口開。以至臨清七百餘里。皆賴蕪萊諸泉。南北分濟。道里既遠。水力自微。其所藉于霖雨者。尤不小也。臣于去年夏秋之間。目擊山東地方苦旱良久。已經撫按衙門。題請蠲賑。入冬兩尚愆期。雪不盈寸。臣逆慮漕河淺澀。即嚴行司道及管河諸臣。疏導泉穴。挑濬漕渠。及將汶河諸水挽入湖坡。貯蓄以待不時之需。凡可爲漕計者。似無遺力。該司道所云濬河則河身不淺。導泉則泉穴俱闢。誠有然者。第因山東久苦乾旱。入春雨澤全無。亢暘愈甚。陰雲稍合。旋被風散。此皆臣等奉職無狀之所致也。泉流日微。漕水日涸。閉閘積水。兩日方可盈漕。所幸今歲漕糧不多。徐北業已過濟。頭幫已出臨清板閘矣。獨上江運艘。共計一百八十七隻。尙未過濟。而鮮貢之船。亦多陸續前進。臣嚴行管河各官。將南旺蜀山馬場馬踏等湖。封閉蓄水。取有甘結在卷。候運船至日。放水送舟。量亦無誤。但慮狂風簸蕩。烈日薰蒸。湖水不免漸消。臣與司道諸臣。晝夜徬徨。寢食爲廢。日望天降時雨。以濬燃眉之急。而竟未可得也。考之春秋三月不雨。即以示警。今不雨者自冬歷春。由春入夏矣。寧能保其不涸乎。臣查得萬曆十六年四月間。山東巡撫都御史李戴。亦以久旱不雨。漕渠淺澀。會同勘工。都給事中常居敬。題請躬詣泰山祈禱。奉聖旨。便着該巡撫官虔誠祈禱。禮部知道。欽此。諸臣遵行。未幾而大雨如注。蓋聖德隆盛。素格天心。意念

所及百靈效順。宜其響應如此。伏望我皇上。容臣比照前例。率同司道等官。齋食素衣。躬詣泰峙。建壇祈懇。仰冀旱魃潛消。甘霖速降。則非惟運道可免淺澀。而民生亦可望其有年矣。奉聖旨。着河道官竭誠祈禱。該部知道。

### 添募夫役以裕河工疏

臣潘季馴謹題。爲添募夫役以裕河工。以安民生事。據中河分司工部郎中沈修。徐州道管河副使陳文燧呈稱。照得國家定鼎燕都。歲運東南。梗粟四百萬石。涉江淮。經邳徐入閘。必資黃淮二河濟之。嘉隆以來。河決崔鎮。淮決高堰。高寶興鹽山清桃宿等處。田廬蕩溺。正河淺涸。轉運艱辛。東修西潰。數十年無寧宇。至萬曆六年。蒙本院勦築遙隄。重門禦暴。盡塞諸決。束水歸漕。田地始獲耕種。民居亦得安堵。迄今已逾十年。而隄長夫少。修守乏人。以致車馬踐踏。風雨剝蝕。日見卑薄。近蒙本院調撥山東徭夫三千九百餘名。倩派徐邳靈睢宿遷夫一萬二千餘名。大加修築。工已告竣。而各夫犒賞。動經數千。歲修銀兩。僅供物料。不免稱貸于漕庫。民固稱勞。官亦告匱。甚非久安長治之策也。爲今之計。必須添夫一千二百餘名。分撥險要去處。專令廉幹官一員。管理修守。庶幾不至墮悞。但添夫不難。而增餉難。每夫工食八兩。該銀九千六百

兩當此民窮財盡之時。豈宜派及里甲。查得萬曆十六年本院會同漕撫衙門奏留二升米銀內。相應動支召募等因。到臣該臣看得治河之法。平時有修築之工。伏秋有防守之苦。一有不周。禍患立至。夫役減少。固難責以全功。起派鄉夫。又不免于騷擾。隨查中河所管地方。北自鎮口。南至清河縣。兩岸共一千餘里。而豐沛蕭礪四縣隄岸。又約二百餘里。原設夫役頗多。祇因工食缺乏。日漸減削。僅存五千五百餘名。計里分派。每里不及五名。中間又多逃曠。以至歲修之時。不免派及鄉夫。而犒賞之費。動經數千。貧夫所得不多。官司設處甚苦。且與其勞費于既壞之後。孰若預辦于未壞之先乎。所據司道之請。誠有不可已者。伏望敕下該部。再加查議。如果臣言不謬。容臣劄行司道。轉行淮安府。每歲于臣等奏留輕齋二升米銀內。動支九千六百兩。分發沿河各州縣。募有身家之人。共一千二百名。責令廉幹官員專管。分布要害處。所平時加土幫築。伏秋晝夜防禦。庶幾河防有人。閭閻無擾。未必非永賴之策也。再照前項米銀。以全漕計之。約有二萬七千餘兩。但每歲俱有折兌。即如萬曆十七年止。有一萬九千七百二十五兩。十八年止。有六百二十六兩六錢。以致原借漕庫。欽修銀兩。尙未補足。以後此等年分。難保不無。仍乞特賜允行漕撫衙門。如遇二升米銀不足。容臣暫于漕庫借支別項銀兩。給散各夫。候下年解到之日。如數補還。則餉不病于告匱。而堤可恃以長固。民可藉以少安矣。謹題請

旨奉聖旨工部知道該工部覆奉施行

### 官旗挾帶私貨疏

臣潘季馴謹題爲官旗挾帶私貨十倍明例壅阻漕渠乞恩申飭成規以釐夙弊以裕轉輸事。據管理漕務參政吳同春呈蒙臣憲牌查得江西南饒二衛所糧船私帶木筏甚多塞滿河路。仰道會同濟寧道速令江西運糧把總公同管河同知將木起放在岸要見某衛所某船見帶板木若干共秤重若干斤具數呈報催船星夜前行木植留人看守等因。又蒙漕撫部院牌仰本道即查前船如果因帶板木變賣故行遲延每船除例帶土宜六十石如係板木每一百斤准算一石此外但有夾帶過多者查明入官將船催趕前進等因。依蒙會同濟寧道行委兗州府管河運司同知陳昌言江西把總賁躉秤盤過木數到道爲照今歲糧船爲數甚少運納宜速詎意南饒二衛所多帶木筏擠塞河路殊屬違玩既經管河同知查勘前來即應照議沒官。但板木就水稱盤低昂恐未盡確合無備行陳同知將前堆寄濟寧板木一百三十六萬五千一百九斤內量除二十八萬五千一百二十九斤入官變價作正支銷仍將一百七萬九千九百八十斤照依原盤各船數目撥給軍人收領任其發賣及又揭稱漕運議單內開運軍土宜

每船許帶六十石。沿途遇淺盤剝。責令旗軍自備脚價。例外多帶者。照數入官。乃今法久人玩。違禁攜帶。十有八九。各船每到馬頭。輒延緩數日。雖曰挨幫。實爲脫貨。而把總運官。亦或因公濟私。帶貨覓利。總分子于衛。衛分子于所。所又分帶于旗軍。遂致旗軍乘機夾帶。有至數萬斤者。淹滯運艘。稽悞程途。莫甚于此。蓋因盤驗姑息。參罰之例未定。人情狃于因循。相應議處。以後開兌。司道嚴諭各船。止帶別項土宜。限定六千斤。其竹木板片沉重貨物。不許稍帶。違者搜獲。勿論多寡。即發水次衙門入官。每年南船抵瓜儀。則委瓜洲江防同知。抵淮則委淮安驗單推官。抵徐入關則委管河同知。逐一嚴搜。果無夾帶。回報漕司。案候稽考。如前途驗過。後官查有夾帶。即係前官容縱。一體參治。永爲遵守。庶例嚴而實效可臻。源清而流弊自絕等因。呈詳到臣。案查先據兗州府管河運司同知陳昌言。揭稱饒州所續船止三十七隻。稍帶木筏八十三。弔濟寧天井開河擠塞盈滿。每船載木既多。不得不卸爲筏。况以重船而尾復曳以重筏。連綿之勢。撐駕又難。開板既啓。待久水洩。又以河淺爲名。延捱貨賣。及查南昌衛較之該所。更甚。緣由前來。臣即牌行兩道。委官盤卸。隨據濟甯管河副使曹時聘。呈將秤盤過多帶板木數目。令人看守。各船催趕前進。呈詳到臣。已經詳批各官旗故違明例。稍帶私貨。不啻十倍矣。今既停留在岸。姑候各運船抵灣遲速再奪問。今據前因。呈看得歲漕四百餘萬。自瓜儀至淮安則資諸



湖與二河之水自鎮口開至臨清板閘則資汶泗之水。每年四五月間。雨少泉微。正當漕渠淺澀之際。適值糧運盛行之時。臣督管河官員。開湖閉閘。多方蓄水。以求速濟。良亦苦矣。迺今各船私帶重貨。公行無忌。而南饒兩處運船。見卸板木重一百三十六萬五千一百餘斤。而未盤之先。沿途開廠發賣已多。該道所報僅及其半。船內磁罈等器。又不知其幾何矣。何怪乎舟行遲滯。抵灣之愆期也。究其來由。運軍一貧如洗。烏得有此鉅貨。盡係運官通同把總。販賣營利。勢壓旗軍。分派裝載。今歲運艘不多。南饒僅八十五隻。稍帶木筏。所至充塞。若遇全運之年。萬艘鱗集。寸步難前矣。其貽漕河之害。甚非眇小。所據把總賁隄及領運指揮朱維祺。千戶張士維等。通同派買之弊。難保必無。而容情阿縱之愆。已屋難追。但沿襲日久。向未申明禁例。姑免參治。隨批該道。將給軍并入官之數。通呈漕司稽考去後。其該道所議。以後開兌。各道嚴諭官旗。止帶別項土宜。不許仍攜竹木板片。及要委官盤驗一節。似應依擬。除聽漕撫及巡漕衙門設法稽查外。竊惟漕米之盈虧。係于漕司。而運艘之遲速。係于河道。合無許令總河衙門分行各管河分司。各照地方分段盤驗。如運船入瓜儀至淮安通濟閘。責之南河郎中。由黃河至鎮口開。責之中河郎中。自鎮口至珠梅閘。責之夏鎮主事。自南陽至安山閘。責之南旺主事。自張秋至臨清板閘。責之北河郎中。但遇糧船入境。把總官投遞官旗及部運船隻名數到司。就便

抽盤遵照議單除應帶土宜六十石外如有多餘或違禁仍帶竹木板片及沿途耽延收買貨物者將貨物盡數入官領運把總及指揮千百戶指名參呈總河衙門具奏提問蓋各分司俱有河道之責貨重難行愆期悞事各司自難諉咎痛癢切身又何敢徇情避怨哉至于開兌起行之時則在該省糧儲道加意檢查嚴行戒諭指顧之間不勞餘力而自可省沿途之擾擾矣如蒙敕下該部再加查議覆奉明旨行臣欽遵施行仍著爲定例永永遵守庶積弊可釐而轉輸自速矣謹題請旨奉聖旨戶部知道

### 戶部覆前疏

題爲官旗挾帶私貨拾倍明例壅阻漕渠乞恩中飭成規以釐夙弊以裕轉輸事該總理河道右都御史潘季馴題前事奉聖旨戶部知道欽此欽遵抄出到部送司查得議單內一欸凡運軍土宜每船許帶六十石沿途遇淺盤剝責令旗軍自備腳價例外多帶者照數入官監兌糧儲等官水次先行抄檢督押司道及府佐官員沿途稽查經過儀真聽僂運御史盤詰淮安天津聽理刑主事盤兵備道詰六十石之外俱行入官經盤官員徇情賣法一併參治遵行在卷今該前因案呈到部看得河道都御史潘季馴題稱江西把總賁捷總下指揮朱維祺千戶張

士維等各官旗挾帶竹木私貨沿途發賣致遲轉運。欲要將應帶土宜六十石外其餘堆寄板木私貨盡行入官。所據把總領運等官法應參治。緣相沿日久向未申明。今次姑免行究。以後開兌之時各要管河分司照依地方如法盤驗。有違禁多帶者盡數入官。將領運把總及指揮千百戶指名參呈。仍着爲定例一節。爲照漕運每船附帶土宜六十石載在議單。實國家恩恤旗軍之典。而不才運官通同挾帶數多。以致排擠滿河。大阻運艘。則非許令附帶初意。若不亟行申飭。將來稽遲糧運。其弊實由于此。既經河道都御史題議前來。相應依擬。覆請。恭候命下本部。移咨河道衙門。轉行各管河分司。此後凡遇糧船到時。即照依各管地方分段盤驗。如運船土宜除六十石外。若有多餘。或違禁仍載竹木沉重等物。及沿途收買貨物者。將貨物盡數入官。仍將違犯運官指名參治。如經管地方盤驗官員徇情賣法。亦遵照議單事例。聽河道衙門一併參處。至于開兌之時。則尤責成該省糧儲道。加意檢查。違者亦同參治。併著爲定例。永遠遵守。併咨漕運衙門知會。及應天浙江江西湖廣山東河南各巡撫一體遵照施行。奉聖旨。是。

恭報三省直隄防告成疏

臣潘季馴謹題。爲恭報三省直隄防告成。乞恩申飭修守之法。以圖永賴事。伏念臣犬馬餘生。甘心草莽。謬蒙我皇上天高地厚之恩。拔之廢棄之中。授以總河之任。覩顏受事。忽復三秋。兩河工程。業已曲爲之制。而周爲之防矣。才識固有未融。而心力不敢不竭。隄防雖已稍備。而修守不可不嚴。謹將做過工程。開列陳請。除南河邵伯高寶范口禮壩中河張福王家二隄夏鎮塔山鎮口北河開壩湖隄各欽修土石等工。該臣於萬曆十七年五月二十四日將完過緣由。具疏奏報。不敢贅瀆外。節據中河郎中沈修徐州兵河按察使陳瑛見任副使陳文燧呈稱。節奉本院劄案。爲申明修守事宜。以圖永賴等事。行職等將先後題准應修隄工。勒限興築。上緊覈竣。職等遵依督率分委府州縣等官。親詣工所。如法率作。至萬曆十八年五六等月各日期。不等通完訖。一應料物犒賞等銀。俱於歲修銀內動支。並無請有別項錢糧。爲照徐淮一帶河道。自昔萬曆八年。本院勅築遙隄。高厚堅實。水循故道。經今十年。運艘利涉。居民安堵。凡司河道者。俱享平成之利。近年以來。風雨損壞。夫役停減。修補失時。加以連歲異常洪水。縷隄逼臨河身。掃灣衝刷。易於塌陷。若非遙隄保障。難免無虞。今蒙督促。大加幫修。悉如舊式。及議築格隄。以防決水橫流。自夏徂秋。暴漲數次。河南水高一丈五尺。而隄壩無恙。以後歲加修守。卽爲久安長治之策。并將加幫勑築徐州靈璧睢寧邳州宿遷桃源清河沛縣豐縣碭山共十州縣

遙隄縷隄格隄月隄太行隄土壩等項。共長一十萬四千三十九丈一尺。各高厚如式。數目開呈前來。又據夏鎮主事余繼善會同徐州道呈。同前因。及備開幫。幫築完沛縣徐州支廟及縷隄長隄。繹路土壩等項。共長二萬一千九百六十六丈八尺。各高闊數日。又據河南管河原任副使陳九仞。見任副使李三才。各先後呈報。幫築。幫築接補完滎澤原武中牟鄭州陽武封邱祥符陳留蘭陽儀封睢州考城商邱虞城河內武陟。共一十六州縣。遙月縷橫等隄。新舊大壩。共長一十四萬四百九十四丈七尺九寸。俱覓真淤杵實。並非昔日雜沙虛鬆可比。委堪捍禦緣由。并各工程細數開列前來。又據濟甯兵河陞任按察使曹子朝。見任副使曹時聘。節次呈報。修築完曹縣單縣新舊隄壩。并加幫完太行隄。共長二萬六千四百四十七丈七尺七寸。挑改過梁靖口河渠。長一百八十丈。見今武王二壩。逼水南徙。黃河安流等因。各開報到臣。據此案。照萬曆十六年十月十四日。准工部咨。該臣題爲申明修守事宜。以圖永賴事。欵開一立法增築遙隄。以固隄防。淮徐之民。十年以來。所以得免魚鱉之患。而運道不致梗阻者。恃有遙隄也。向無稽考。未補分寸。剝食過半。合行司道官。將各隄坍損卑薄者。以原隄丈尺爲準。先行加幫取平。後自十八年爲始。每歲加幫五寸等因。工部覆奉聖旨。河道每歲修防。先年題有定規。乃各該官員。不行着實遵守。曠職誤事。這所議。俱依擬行。如有仍前怠玩的。總河官指名參奏。

重治。欽此。備咨前來。又於本年十二月十九日准工部咨。該臣題爲申明河南修守事宜。以固河防事。款開一查得黃河北岸。逼鄰漕河。關係甚重。弘治年間先臣劉大夏築有長隄一道。起自曹縣至武陟縣詹家店止。南岸逼近省會。藩封重地。最爲要害。亦有長隄一道。起自虞城縣至滎澤縣止。兩隄延亘千有餘里。實爲該省屏翰。但地鮮老土。隄皆浮沙。而河流遷改靡常。多有濱河難守者矣。今據該道逐一查覈。分爲緩急二工。容臣嚴行刻期幫築。加意驗探。如有墮誤。或夾雜浮沙。或夯杵不實。苟且塞責者。容將管河官參拿究治等因。工部覆奉聖旨。依議行。欽此。備咨前來。又於萬曆十七年十月二十四日准工部咨。該臣題爲三省直修防告竣。河流近已歸漕。據實恭報。仰慰聖衷事。本部覆議。趙皮寨至李景高口議築遙隄。支將軍廟至塔山議築長隄。羊山至土山議築橫隄。皆區畫周悉。於河道有裨。相應依擬等因。題奉聖旨。是河道事宜。着總理等官。照舊用心經理。欽此。備咨前來。俱經通行司道。勒限興工。去後。查得加幫遙隄。適值去歲黃水暴漲。修防不暇。止將象山一帶二十餘里加幫高厚。其餘尙未施工。已經嚴督中河司道。大加幫築間。續據中河司道議得。單家口一帶河身獨窄。隄臨河濱。原題棄縷守遙。惟恐黃水橫肆。順隄東洩。合照原題邳州橫隄之制。再於房村單口雙溝成舖辛安等處。各增築格隄一道。又據河南管河道副使李三才。勘得判官村荆隆口陶家店馬坊營三家莊陳

隆莊大寨等處。最爲險要。將幫舊剏新隄壩等工。繕議呈詳。俱經臣覆勘允當。批行興舉。刻期完報。去後。今據前因。覆覈相同。臣竊惟防河如防虜。自古記之矣。防虜則曰邊防。防河則曰隄防。邊防者。防虜之內入也。隄防者。防水之外出也。欲水之無出。而不戒於隄。是猶欲虜之無入。而忘備於邊者矣。且自古稱治水者。莫過於禹。而考之禹貢曰。九澤既陂。四海會同。先臣蔡沈釋之曰。九州之澤。已有陂障。而無決潰。四海之水。無不會同。而各有所歸。陂障即隄也。神聖如禹。而猶不免致力於隄。則舍隄之外。別無所以防河者矣。臣於萬曆六年奉命治河。即請築遙隄。以防其潰。築縷隄。以束其流。八九年間。河流順軌。故道晏然。業有成效矣。而歲久官更。弊滋法弛。以河防爲末務。視隄工爲贅疣。一簣莫加。萬夫閑曠。而車馬之蹂躪。風雨之剝蝕。河流之汕刷。高者日卑。厚者日薄。又何怪其東潰西決哉。荷蒙我皇上授臣以總理之權。責臣以修復之事。臣襍綫微才。固不能別爲新奇之策。而管窺小見。尤不敢爲僥倖之圖。惓惓以隄防陳乞。謬承俞命。畢力仰成。督率南直隸河南山東司道等官。將濱河一帶地方。躬親荒度。周爰諮諏。舊有而今圯者。則議加幫。舊無而宜有者。則議翔築。遙隄約攔水勢。取其易守也。而遙隄之內。復築格隄。蓋慮決水順遙而下。亦可成河。故欲其遇格即止也。縷隄拘束河流。取其衝刷也。而縷隄之內。復築月隄。蓋恐縷逼河流。難免衝決。故欲其遇月即止也。防禦之法。頗稱周備。較之

已卯告成之功。更爲詳密。而夏鎮河南山東往歲原未經理者。皆一體增建矣。倘能歲守不失。則河流自無衝決之患。河不衝決。則故道晏然。翕由順軌。而運艘自無阻滯之虞矣。但畚土成隄。原非鐵石。稍不修葺。便至傾頽。歲歲修之。歲歲此河也。世世守之。世世此河也。故歲修錢糧之設。徭編雇募額。夫凡以爲河也。而可置之虛糜閑曠之地哉。臣是以諄諄爲申明修守之請也。伏望天語叮嚀。嚴諭地方司道等官。查照臣愚節次題奉欽依事理。每歲務將各隄頂加高五寸。兩傍汕刷及卑薄處所。一體幫厚五寸。年終管河官呈報各該司道。要見本隄原高闊若干。今加幫共高闊若干。司道官躬親驗覈。開報總河衙門覆覈。年終造冊奏繳。不如式者。指名參究。庶河防永固。而國計民生。俱有賴矣。臣又查得連年司道等官。肩仔河工。頗竭心力。除府佐州縣掌印管河官候秋防報竣。另行題請獎戒。原任河南管河道副使陳九仞已經論劾。難以另議外。如中河分司郎中沈修夏鎮分司主事余繼善徐州兵河道陞任按察使陳瑛見任副使陳文燧河南管河道副使李三才山東濟甯兵河道陞任按察使曹子朝見任副使曹時聘。謀謨已竭其心思。匪勉不辭於夙夜。祁寒溽暑。逐逐於畚鍤之內。而寢食靡寧。鳩工聚材。斷斷於會計之時。而錙銖不爽。大興千里之築。如垣如墉。皆其心膂所致。共圖久遠之計。必誠必慎。不爲苟且之謀。况工料取辦於歲修。絕無虛糜之幣。而胼胝侵尋於歲月。未聞倦勤之時。固



皆分義當然不敢別有希冀。相應咨部紀錄。庶幾稍勸羣工。再照三省直之道途頗遠。臣一身委有難周。河南兩岸隄工。皆都御史周世選一身肩承。羣策畢舉。當饑饉之日。而鼓舞有方。貧民樂爲之用。當暴漲之時。而提撕不懈。地方賴以無虞。實多保障之功。全無矜伐之意。本官已蒙簡拔。似難瀆諱。然臣不敢掠其功。以爲己功。蔽其賢。而不以告之君父者也。伏望敕下該部。再加查議。覆奉明旨。容臣遵奉施行。臣愚幸甚。河防幸甚。謹將完過工程數目。具本開坐。謹題請旨。

計開

南直隸工程

總管官中河郎中沈修。徐州兵河陞任。按察使陳瑛。見任。副使陳文燧。督同淮安府陞任。同知徐伸。丁憂。同知申安。見任。同知唐民敏。分委都事胡傅。指揮文棟等。徐州迤南幫築完。南北兩岸遙隄。共長六千三百七十四丈二尺。幫築完。谷山隄頭長六十丈。加築完。谷山子隄長八十丈。幫築完。房村格隄長四百九十六丈。單家口格隄長三百一十八丈。本口幫築完。南北兩岸縷隄。共長五千八百三十八丈。加幫完。該州迤北黃河上源縷隄。長三千六百二十三丈。靈璧縣南岸幫築完。遙隄長三千七百二十七丈。幫築完。雙溝格隄。長四百一十五

丈填完河身底長四丈口長六丈深七尺。幫築完南岸縷隄共長二千二十七丈五尺。加築完子隄長一千六百二十丈。築塞單家口私開涵洞缺口長八十丈。睢寧縣南北兩岸幫築完遙隄長八千九十五丈。剋築完成字舖格隄長四百三十二丈七尺。河口三道俱有廂邊埽土牛幫護。辛安格隄長三百五十六丈。加幫完兩岸縷隄共長一萬五千七百八十一丈。補築完成字舖隄長一百四十九丈。邳州南北兩岸幫築完遙隄共長一萬二千八百三十二丈四尺。剋築完羊山橫隄長四百七十三丈。築過橫隄迤西水口長四十丈。加幫完縷隄共長一萬三千八百二十五丈。宿遷縣南岸加幫完遙隄長七百四十三丈四尺。修築完歸仁集隄長五千七百五十六丈。幫築完南岸縷隄共長六千七十六丈。桃源縣南岸加幫完馬廠坡隄長一千五百丈。修砌完馬廠閘鴈翅長八丈六尺高七尺。幫築完北岸遙隄長一千三百三十七丈。修補完崔鎮徐昇季太三義四滾水壩。兩鴈翅迎水接連土隄共長四十八丈。清河縣南岸加幫完張福口王家隄共長四百一十丈。幫修完縣前圍隄長一百零八丈。沛縣加幫完張村店一帶縷隄共長三千零四十丈。填補完縷隄雨淋缺口共一千八十二處。共計九百二十丈。太行隄雨淋缺口共三千二百七十處。共計一千一十丈。碭山縣加幫完大壩六段。共長一千四百八十六丈五尺。幫築完劉金樓白川店縷隄。共長一千零八

十丈。豐縣加幫完清水河大小月隄并邵家大壩邀城寺月隄共長五千八百八十七丈。補築完田劉口隄四十六丈四尺。塞完涵洞一處長二丈七尺。填完縷隄缺口水溝共一千四百五十七處。補完太行隄缺口水溝共一千五百九十七處。總管官夏鎮主事余繼善徐州兵河陞任按察使陳瑛見任副使陳文燧督同陞任同知徐仲丁憂同知申安見任同知唐民敏等沛縣境山起至留城一帶。又自大隄頭起至地浜溝止運河緯路兩次幫築完隄共長一萬五千八百丈。加幫完塔山縷隄長七百五十丈。幫築完支將軍廟縷隄長七百五十丈。內有水口一百二十丈。俱下埽三層。其尤要害處水口四十丈。加埽一層。俱用排椿深釘。幫築完留城至黃家閘東隄長二千六百三十九丈。修砌完石壩一座。長闊共一百四十五丈。修補完鎮口閘東西鴈翅共長四十六丈三尺。幫築完鎮口閘西隄起至大隄頭止長一千五百四十五丈。徐州上河築完牛頭灣梁山等處壩共十五道。計長三百丈零三尺。幫築完伊家林隄長三十七丈五尺。

河南工程

總管官管河道原任副使陳九初見任副使李三才督同開封府加從四品服色同知吳克勤同知張士奇懷慶府同知劉應聘歸德府通判蕭汝慎等管理滎澤縣幫築完北岸甄家

莊舊隄共長四千三百八十六丈三尺四寸。郭家潭等處長隄共長一千七百七十二丈八尺。填平潭窩底闊四五丈至二十二丈。口闊四丈至六丈五尺。深七八尺至二丈二尺。南岸幫築完小院村舊隄長二千二十丈。朱家莊等處隄長五百四十八丈。幫築完曹家屯遙隄長三百九十六丈。遼築完梨園村月隄長二百三十丈。幫築完蘇家莊舊隄長二百丈。原武縣北岸幫築完姚村隄長七百五十八丈。婁家莊隄長三百四十九丈。胡村舖隄長七十二丈。婁彩店隄長三百五十六丈。王村正南舊隄五段共長二百八十九丈。幫築完張家莊月隄長一千二百五十五丈。幫完本莊舊隄長二百二十三丈。舊壩長一百八十丈。幫築完小陳橋等處隄長四千二十七丈七尺。師家莊舊隄共長五百四十四丈。判官村舊隄長九百三十五丈。舊壩長一千零六丈。中牟縣南岸幫築完黃煉集隄共長二千四百丈。幫築完新莊集隄長七百八十七丈七尺。幫築完舊隄六百一十七丈四尺。鄭州南岸幫築完小陳橋舊隄長二百三十丈三尺。陽武縣北岸幫築完脾沙岡隄長一千八百三十四丈六尺三寸。幫築完壩長三百丈。幫完舊壩長二百丈。幫完宋家莊舊隄長二百四十六丈。王佑莊舊隄共長四千四百丈。南岸營家莊後至圓墩寺止原題應幫舊隄共長三千三百六十四丈。內除一段照舊外實幫完隄長一千八百九十四丈。接補完本寺迤北舊隄長一百七十三丈。

剏築完賈家寨月隄長九百丈。申家寨遙隄長四百五十五丈。幫築完舊隄共長二千六百三十丈。又接築完本寨迤東舊隄長四百八十二丈。封邱縣北岸幫築完于家店中藥城舊隄共長八千八百四十七丈二尺。舊壩長七百丈。幫築完蕭家莊張家莊壩并潭窩共長一百七十五丈。剏築完原題荊隆口遙隄長二千五十六丈。填完根下河身三處。共長二十八丈九尺。潭窩二處。共長一百七十五丈。幫築完本口壩三段。共長一百四十七丈。接築完隄三段。共長四十二丈。幫完東姜寨老隄七段。共長八百二十丈。祥符縣南岸幫築完瓦子坡舊隄長一千八百七十一丈一尺二寸。柳青口橫隄長四十六丈。劉獸醫口舊隄共長五千○五十七丈三尺。剏築完原題劉獸醫口遙隄比原估稍直。省減九百六十八丈。實築長二千七百三十二丈。幫築完陶家店兔伯堽埽頭集舊隄三道。共長七千七百六十六丈。填完水坑六箇。共長四十四丈。陶家店幫完舊壩長一百丈。張家灘築完新隄長六十丈。剏築完月壩一段。長三百五十丈。幫完壩岸共長一千三百二十六丈。剏築完遙隄長一千零五丈。補完缺口五十七處。共長二百一十二丈。填完坑窪一處。長四十丈。剏築完李英仲寨遙隄長一千五百五十丈。填平本隄東西兩頭坑共長二十丈。幫築完槐疙疸隄共長一千三百一十五丈。填完水坑一處。長一十五丈。北岸幫築完馬家口舊隄共長一千七百七十丈。填

完王盧寨起至魚里止行車路口三十六處。坑窪五處。共長一百四丈九尺五寸。幫完貫臺  
陳橋集隄長五千七百一十丈。接築完省城周圍大隄共長一萬三千八十丈。修補完缺口  
拖脚八十一處。共長一千五百七十二丈。帮築完劉家寨遙隄長二千九百三十丈。陳留縣  
南岸幫築完解家堂舊隄長三千二百四十丈。北岸幫築完陳留寨隄岸二段共長一千一  
百四十丈。蘭陽縣北岸加築完楊家莊舊隄長一千六百丈。銅瓦廂舊隄共長三千三百二  
十二丈。張村集舊隄共長一千八百五十五丈。馬坊營舊隄共長二千六十三丈。帮築完本  
營月隄長六百五十丈。又遙隄長五百五十二丈。填完溝渠坑窪一百一十八處。共長二百  
九十丈一尺。南岸帮築完趙皮寨遙隄長一千七百五十四丈七尺。幫築完草廟舊隄長二  
千六百七十丈。補築完草橋等處舊隄內有車踐缺口二十一處。共折長二十一丈。儀封縣  
北岸帮築完煉城口隄長一百七十五丈六尺。又築完遙隄長一千七百五十丈。幫築完舊  
隄長一千五十丈。內填完行車大埠口二處。共長十丈。舊壩長六百五十六丈。壩後有坑長  
二百五十丈。填與地平。幫築完榮花樹舊隄長一千六百三十三丈。填完行車大埠口二處。  
共長十丈。加築完沔泥河舊隄長六十九丈。補築完舊壩長三百七十丈。加築完三家莊舊  
隄長三百一十六丈。舊壩長一百九十一丈。填築完拖脚缺口一十九處。共長一百七十丈。

剏築完護壩一道長三百七十五丈。南岸幫築完普家營葛田口隄共長四千六百七十四丈。岔股隄長二千六百三十丈。剏築完李景高口遙隄長六百丈。大寨月隄長六百二十丈。補築完缺口拖脚二十八處。共長二百八十丈。接築完護城隄三段。共長九百四十丈。睢州南岸加幫完大城集舊隄二段。共長三百五十丈。考城縣北岸加幫完芝蔴莊月隄長七百三十丈。舊壩共長三百五十七丈八尺。填完坑窪三處。共長五十三丈。接築完新壩三段。共長一百五十四丈五尺。填築完本莊背後月隄一道長一千三十六丈。補築完陳隆莊護壩長八十八丈。幫築完月隄長六十五丈。內有坑長六丈深一丈二尺。填平上築高一丈二尺。剏築完壩岸長一百六十丈。補築完李秀廠唐家水口回龍廟流通集董家莊五處。隄壩共長五百二十四丈五尺。填完水坑長二十八丈。南岸幫築完遙隄五段。共長五百五十丈。商邱縣南岸補築完楊先口缺口一處長一十八丈。幫築完本口隄長三十二丈。又本口迤東幫完舊隄長四百三十八丈。口西幫完隄長十六丈五尺。加幫完楚家灣東隄長十一丈。虞城縣南岸幫築完羅家口隄長二千四百丈。河內縣沁河南岸補築完古陽東西壩共九段。長三百四十四丈五尺。幫築完縷水隄自開口起至安家樓止長二百丈。武陟縣沁河北岸補築完大原村壩二段。共長四十四丈五尺。沁河東岸補築完隄長六丈五尺。壩長二百六

十丈填完水口長一十五丈。廟後覆土長一十一丈。廟前覆土長八丈。又幫完隄長二百六十丈。蓮花口幫築完壩長一百八十三丈一尺。壩後幫築完戩隄長一百六十四丈。本口添幫隄長一十一丈。接築完縷隄長四十丈。幫築完大樊村隄長四十五丈。幫築完郭村隄長四百八十五丈五尺。沁河南岸修築完護城隄長四百四十二丈。黃河北岸詹家店王化營幫築完隄長一百丈。幫築完隄長一千三百五十九丈。內有缺口一十三處。長一百六十四丈。俱幫填完。

### 山東工程

總管官濟甯兵河道陞任按察使曹子朝見任副使曹時聘督同兗州府管河運司同知羅大奎等管理。曹縣武家壩幫築完舊老隄自二十九舖起至三十五舖止。共長二千四百丈五尺。加幫完土壩馮家廠王家壩等處共二十九道。共長七百九十九丈。接築完王家壩後護壩一道長二百二十丈。加築完董家口史家樓壩四段。共長四百八十丈。幫築完大王廟起至劉滿莊止隄長二百二十五丈。修築完曹家集半市屯劉滿莊月隄共長二千五百二十三丈五尺。幫築完舊老隄三舖至七舖又自三十舖起至重隄北頭止共長二千二百二十九丈九尺五寸。幫築完王家壩埽臺三段。共長二百二十七丈。填半窪坑長六十三丈二



尺二寸。加築完埽臺起至窰南隄長三百七十八丈。幫築完裏河隄自八鋪起至十六鋪止。長四千八百七十六丈。壩南重隄長一百零三丈。加修完太行隄自十七鋪起至二十五鋪止。長四千八百六十丈。挑濬過梁靖口洩水支河長一百八十丈。單縣幫築完十八鋪隄長五百四十丈。縷水隄自十鋪至十七鋪止。長三千二百四十丈。縷水月隄長五百四十一丈。五尺二寸。幫築完頭鋪廂翅上壩長四十丈。加修完太行隄自十五鋪起至二十鋪止。長二千七百六十四丈八尺。以上通計幫築過各項隄壩共長二十六萬四千五百六十一丈九尺六寸。幫築過各項隄壩共長二萬八千三百八十六丈五尺。開挑過河渠長一百八十丈。

河上易惑浮言疏

臣潘季馴謹題。爲垂亡之人。憂思轉切。謹摘河上一二易惑浮言。乞恩俯賜勘議。以定久計。以免勞費事。伏念臣潦倒無知。久甘昧畝。誤蒙我皇上拔之既棄之餘。授以總理之任。二三年間。殫竭心力。一應事體。請自聖裁。種種俱有成畫。試有小效矣。尚有一二事宜。理本如此。而人言必不如此。工本難爲。而人情必欲強爲。若不早爲勘議。浮言不免蝟興。全河之工。未必不由此而決裂也。敢敬陳之。夫鎮口閘內爲汶泗清流。鎮口閘外爲黃沁濁流。平時清濁相當。內水外

出頗順。惟黃水一發，則黃強清弱，倒灌入漕，而河渠淤澱。此理勢之必然者。上源山陝以西，雨少則黃水易消，而內水之出速。上源雨多則黃水難消，而內水之出遲。此又理勢之必然者。自用河爲運以來，灌塞之患，無歲無之。其年遠無卷及旋淤旋通者，無論矣。臣姑以嘉靖末年，尙有卷簿可查者言之。查得嘉靖四十一、二、三年黃水由大小溜溝曾漕於夾溝驛南，黃漲漕淤，糧艘阻滯。該總河都御史王士翹行徐州領夫挑通。嘉靖四十四年，大小溜漕淤斷。該總河都御史陳堯行徐州一面挑濬，一面起剝前進。隆慶元年，黃河南徙，秦溝曾漕於梁山之北，淤塞無異溜溝。該總河尙書朱衡行徐州洪分司督夫挑濬。隆慶二年，黃河衝塞，濁河改至茶城，與漕交會。茶城之稱自此始。隆慶三年，茶城淤開重運。該總河都御史翁大立具題，要從馬家橋經地浜溝至徐州子房山下，另開新河，以避茶城之淤。續因黃落漕通，前議隨寢。隆慶四年，茶城填塞，八里內水漫。由張孤山東衝出，翁大立具題，就於張孤山開河。本年冬，本河復塞，仍將茶城挑通。原議隨寢。隆慶五年，茶城淤淺。該臣先任總河，行委經歷韓柏部夫常川撈濬，運艘賴以無阻。隆慶六年，茶城淤阻。該總河侍郎萬恭行司道疏濬通行。萬曆元年八月，茶城淤塞。該工部題行總河衙門設法挑濬。萬曆二年，黃水倒灌，淤漕三十餘里。該總河都御史傅希摯集夫挑濬。前給事中吳文作題將翁都御史原議，馬家橋出子房山開河一道，行傅都御史勘得。

子房山前蝦蟆山西俱有伏石馬家橋一帶俱係水占難以議開前議遂止萬曆三年十一月內黃水大發茶城淤塞十里調夫挑通萬曆四年茶城淤淺糧運艱阻復開張孤山東以冀此塞彼通至萬曆五年二河俱淤復開茶城正河通運萬曆六年茶城淤淺徐州道參政游季勳築過順水丁頭壩一十六道束水衝刷萬曆七八九十等年淤塞尤甚至十一年間該中河郎中陳瑛議呈漕撫尙書凌雲翼改漕河淤古洪出口即今之鎮口閘河也剏建內華古洪二閘遞互啓閉淤難深入而去黃河口僅一里挑濬甚易人頗便之萬曆十五年秋黃水大發河與閘平而根徒段守金私受民船重賄將牛角灣掘開黃水迸入淤塞甚遠議者欲復歸德府丁家道口故道使黃冰盡出小浮橋以免濁河內灌該勘工都給事中常居敬看得閘河出口無往而不曾黃則無往而不受淤豈從濁河則淤而出小浮橋則否耶具疏題寢請於古洪閘外添設鎮口一閘去河僅八十丈縱有沙淤挑濬尤易蓋深知清黃交接之處難免淤灌故不得已而爲易濬之計良有以也今之議者不察水勢不鑒往昔偶見淤墊議論風生如臣昏庸無足論矣向來總河諸臣豈無一人高才朗識者乎而卒無如之何也大小溜溝淤矣改而爲梁山北淤亦如之梁山北淤矣改而爲茶城淤亦如之茶城淤矣改而爲張孤山東淤亦如之張孤山東淤矣復改而爲茶城淤亦如之茶城復淤矣改而爲古洪淤亦如之勞民傷財畢竟無

益所幸郎中陳瑛都給事中常居敬先後剏築三閘。遞互啓閉。而挑濬始易。計無出於此矣。臣又查得萬曆十六年閏六月內。該臣題爲清黃交接處所。濁流倒灌易淤。懇乞特降綸音。以嚴開禁事。要將古洪等閘。每遇黃水暴發。卽下板以遏濁流之橫。黃水消落。則啓板以縱泉水之出。比照清江浦三閘啓閉之法。刻石金書。豎立各閘。俾知畏忌等因。題奉聖旨。是各閘啓閉嚴約。俱依擬有勢豪人等阻撓的。照淮安閘壩事例。卽便拿問枷號。干礙職官。指名參奏。欽此。倘如所題。何至淤澱。而工程難稽。客心難挽。閘上官牌力難阻遏。每照常居敬原題。三閘遞互啓閉之法。通放船隻。縱有淤淺。不過八十丈。旋濬旋放。亦無難者。至於運艘入口。大約俱在孟夏以前。水未大發。淤亦不久。或少加撈濬之工。必無阻滯。舍此之外。別無他策。如謂鎮口逼近濁河。故易灌塞。要得別尋一道。則邳州之直河離濁河二百里矣。而何其淤也。宿遷縣之小河口。去濁河三百餘里矣。而何其淤也。清河縣之清口。去濁河五百餘里矣。而全淮之力。十倍於漕。何以黃發卽澀。而每歲初伏。通濟閘外捲築輓壩。以防其倒灌也。要之黃強清弱。隨處相接。則隨處倒灌。隨處淤塞。總之不出科臣常居敬所云無往而不曾黃。則無往而不受淤。兩言盡之矣。似不必過爲紛更也。但人情不見其形。未信其影。必須勘議。以杜後言。此其一矣。臣又查得濱河州縣。河高於地者。在南直隸則有徐邳泗三州。宿遷桃源清河三縣。在山東則有曹單金

鄉城武四縣在河南則有虞城夏邑永城三縣而河南省城則河高於地丈餘矣惟宿遷一縣已於萬曆七年改遷山麓其餘州縣則全恃護城一隄以爲保障各處久已相安並無他說惟徐州則議論稍多其故有二一以山陝久旱之後連歲雨水頗多伏秋不免加漲觀者不考其源而惟歸罪於河固無怪其然矣一以前歲十一月間知州張世美初任未諳爲義民官盧泰所愚開隄放水遂忘築塞消凌水發黃水灌入內濠俾友街衢地方官民不歸罪於知州張世美與義官盧泰而惟歸罪於河至有謂護隄與城平者有謂泉從地湧者夫護城石隄自昔有之非一二年間所築者則河之原高於地可知矣且隄高不過丈餘遂謂與城相平城何若是其卑耶徐州爲邳睢上游徐州而水平隄隄平城也則迤南一帶州縣皆陸沉矣有是理哉且黃河入伏始漲秋杪漸消冬春則涸隄外露有沙灘非經年滄浸者近該徐州於去年十一月間揭稱河水已消再過數日內水可放臣近又令人視水將及址矣今稱入冬黃水尙與隄平則伏秋又將何如耶至於隄內之水蓋因盧泰灌放頗多兼之去歲雨雪甚頻徐民不善車戽一時難於消涸若謂泉從地湧則城中之水宜向與外河相平即護隄無所用之矣何待盧泰放灌之後方有水耶非臣所能解也然臣有治河之責凡可圖維即宜曲處不必問其人言之有無也臣已行徐州道將城中窪地用土墊高仍一面撥夫車戽復查最低之處開洩自去年

九月以來。向在料理。不敢弛墮。但爲今之計。惟有屏城濠之水。使內水可洩。固護城之隄。使外水不入。正盧泰之罪。以警將來。或加高徐城數尺。以防不虞。此則事理之所當爲。而人力之所可爲者也。舍此惟有比照宿遷縣事例。遷城而已。蓋所患者。惟徐城之恒水。於運道原無阻礙。若必欲卑黃河伏秋之水。以就徐城之地。則天地氣候之自然。恐非人力所能強遏者。勞民傷財之事。或從此起矣。人情厭舊喜新。臣言終不盡信。臣在自當力證。必不依違。第今衰病已劇。死有日矣。獨念臣從事此河。已歷三朝。犬馬戀主之情。豈肯以將去而遂置此河於度外耶。伏望敕下該部。轉行該地方巡撫及各差御史。會同總河衙門。督行徐州道副使陳文燧。或添委海潁二道中河夏鎮二分司。逐一勘議。如有別策。使漕更交接之處。可免淤灌之患。徐州城外之水。可免暴漲之虞。不妨從長計議。如必不可。當仍舊貫。毋徇人情。毋拘成說。務求經久可行之道。不爲勞費無益之工。則事體畫一。而浮言可息矣。再照徐城被水灌浸。以貽百姓之憂者。盧泰實始禍之人。死有餘辜者也。臣據該州申文行道提究未報。此而貸之。何以警後。仍容總河衙門嚴究。以正法紀。庶幾將來知護堤之爲重。而無輕犯者矣。謹題請旨。奉聖旨。

### 司道畫地守巡疏

臣潘季馴謹題爲入伏行河將屆。病痼步履不前。乞敕司道畫地巡守。容臣力疾稽查。以保萬全事。臣竊惟河防喫緊。伏秋爲嚴。而伏秋隄防。巡視爲急。此臣與司道官之責也。但該道政務頗繁。勢固不能專理。司官事權不重。勢亦有所難行。故臣受事以來。春初即出。秋深方歸。凡所以代該道之所不暇。而助司官之所不及者。一切以身任之。東奔西馳。周諮荒度。曾無息肩駐足之時也。今臣年七十有一。去冬暴病。岌危。氣血兩枯。形神盡槁。腰疾成痼。舉足輒仆。三疏乞休。未奉俞旨。即使旦晚褫黜。候代尙未可期。文移催督之事。猶自勉強支吾。而奔走跋涉之勞。實非僂僂蹇澀者所能任也。今歲五月入伏。初夏即當發水。晝夜惶懼。計無所施。反覆思維。惟有司道官畫地巡行。臣時加督察。庶可責成。除河南山東各有專道副使一員。心無他枝。事有成矩。每歲查照舊規。用工修守。無容分任外。查得中河地方。原有郎中一員。與徐州道共理。南河地方。原有郎中一員。與徐州海防二道共理。夏鎮地方。原有主事一員。與徐州道共理。道里頗遠。閱視難周。一人則有所不逮。兩官則易於推諉。合將邳州并睢寧桃源清河三縣。坐派郎中沈修專管。修滿去任。代者接管。徐州并豐沛揚山靈璧宿遷五縣。坐派副使陳文燧專管。山陽縣南地界起至清河口止。又有清江浦起至戴百戶營止。文華寺起至高家堰。越城南止。一帶河防。坐派郎中黃曰謹專管。高郵寶應江都瓜儀一帶河防。坐派按察使張允濟專管。自珠

梅開起至鎮口止并支將軍廟塔山一帶。徐州道所轄地方頗多。相應專派主事余繼善管理。如有疎虞。照地指名參究。肩仔在身。智慮自畢。分委已定。規避自無。合拳獨擊。勝於十羊九牧者多矣。矧今諸隄俱完。兩河循軌。惟欲於掃灣迎溜之處。督促埽護。以免汕刷。洪水暴漲之日。躬親閱視。以防懈弛。此司道之力所裕如者。該道一切往來。姑暫停止。其部臣所轄州縣。有奉該司約束者。容臣提問具奏。臣職任在河。蒙恩以河一日未死。何敢忘河。病劇計窮。萬不得已。而瀾干天聽如此。倘蒙我皇上以河防重務。衰病非宜。將臣即賜罷黜。使臣得以全河付之代者。則死亦瞑目矣。伏望敕下該部。再加查議。如果臣言可採。覆奉明旨。咨臣轉行各該司道。查照應管地方。欽遵施行。庶幾地有專司。人有專轄。利害切心。經理必慎。而河防允有賴矣。奉聖旨。這河道畫地巡守事宜。俱依擬着實行。潘季馴着不妨在任調理。用心經理督察。該部知道。

### 申明修守泗隄工完疏

臣潘季馴謹題。爲申明修守事宜。以圖永賴事。據潁州兵備副使王之猶呈稱。節奉總理河道并撫按衙門劄案行職。將原題准泗州應修護城土石隄工勒限興舉。上緊報竣。遵依轉行鳳



陽府督率該州知州汪一右分委同知等官馬尙綱等親詣工所。如法率作。將原估石隄內應換老土。自北門迤西月隄。由西門香花門南門至東門迤北新橋廟止。共長一千四百五十六丈。貼近石隄內挖深七尺。闊三尺。仍於隄裏幫闊五尺。高七尺。中心挖去五尺。闊一丈一尺。計土論方。共築過老土三萬一千三百六十九方。自新橋口起北至西門牌坊止。應加修石隄長九百三十二丈。加高二尺。用石二層。共砌大石一千八百六十四丈。石隄內加老土九千五百三十九方。自虬蜡廟起由西門至香花門外止。添建子隄長一千六百八十丈。用碎石砌高二尺五寸。闊二尺五寸。自西門牌坊起迤南至東門迤北新橋口止。隄長一千一百六十五丈。裂縫裏外俱用石灰兜抵。又於原議護隄之外。應添修新橋迤南大隄。用石長六十一丈。窰西石隄三處。共用石長二十五丈。攔水壩長二十五丈。攔馬牆一處。以上工程自萬曆十七年七月二十五日興舉。至十八年九月二十九日通完訖。已蒙本院委官親詣各工。覆加閱視。丈量明白。俱各修理堅固。及查採取土石。遵照禁例。老土在盱眙縣西五十里馬過觜縣東二十五里龜山挖取。大石在舊縣迤南潤溪青平山。離城一百二十里。碎石在清河縣地名老子等山。離城四十五里。俱由水路裝運。悉係禁山之外。並無違礙。其原發工料銀四千九百三十兩零五分七厘二毫九微九纖五沙。內支石灰料椿木并匠作夫船工食。共用過銀三千八百九十

九兩三錢六分五釐。實省剩銀一千零三十兩六錢九分二釐二毫九微九纖五沙。貯庫除用過錢糧細數。已委鳳陽府推官蓋國士查盤明的。造冊送覈外。所據完過工程丈尺日期。并經管官員職名。分別勒情。獎戒等第。理合呈報等因。又據鳳陽府推官蓋國士呈蒙總理河道并漕撫衙門憲牌。仰職前去泗州將護城隄工。逐一覈實。依蒙親歷該州沿隄逐工。細加閱完。過土隄。俱係真正老土。夯杵堅實。取驗土色相同。並無夾雜浮沙。石隄亦皆如法修砌。堅固可垂久遠等因。各呈報到臣。據此案照萬曆十六年八月內該臣具題前事款開。一加幫真土。以保護隄。查得泗州護隄。常水一面整石可恃。但石內土隄。霖雨坍塌。石將安附等因。該工部復議築土固石。委宜亟舉。題奉欽依。備咨前來。已經備行該道估勘。得前隄換土加石工料等項。通共該銀四千九百二十九兩三錢六分五厘。通詳各院。隨該前任漕撫侍郎舒應龍。看得修築泗隄。禦淮保城。宜在冬春水落之候。先行攢築。如候催齊工費完足。方行興工。不無稽延時日。批行該道節次查發。鳳陽府并潁州庫貯無礙銀共一千七百三十二兩四錢七分零。運司醃切銀八百一十五兩零。鳳陽府紙贖等銀六百三十四兩二錢二分三毫。廬州府屬并滁州全椒來安二縣積剩銀共三百四十八兩一錢七分一釐五毫。本道自理紙贖銀三百兩。潁州庫貯支剩民壯工食銀六百五十三兩五分六釐零。以上共銀四千四百八十二兩九錢一字。

二釐八毫。委官支領分投興工。尙少銀四百四十六兩四錢四分七釐二毫。呈要查處給發緣由。通詳到臣。會同撫按衙門。查有淮安府庫貯停濬草灣銀六千一百四十四兩六錢。相應於內動支銀四百四十六兩四錢四分七釐二毫。解發泗州補足原估之數。作速償工。勒限本年告完。聽臣等委官覈驗工程的確。錢糧明白。造冊奏繳。其餘存停濬草灣銀兩。仍令收貯淮庫。聽候原議防守清浦河工支用等因。具題本部覆奏。欽依。備咨前來。已行該道督理動發銀兩支用間。臣等又於隄工未舉之先。嚴行該道申飭林例。泗州諸山。密邇祖陵。山前山後。不許取土取石。敢有蚤緣縱夫。在於就近山塹挖取者。即便拿究。取有該州掌印管工官重甘結狀在卷。續據該道呈報工完。惟恐丈尺短少。築砌不堅。又經復委鳳陽府推官蓋國士。覈去後。今據前因。該臣會同總督漕撫右侍郎周案。巡按直隸監察御史龔雲致。看得淮水發自河南之桐柏山。挾七十二溪之水。東會于黃。以入于海。其性最暴。而泗州居淮河之下流。卑于祖陵之地。二丈三尺一寸。而龜山橫截河中。約攔水勢。伏秋之時。不免加漲。此於祖陵形勢。最爲佳勝。而泗州之民。不免有阻洳之患矣。臣等查得宋臣歐陽修先春亭記有云。景祐三年。泗州張守問民之所素病。而治其尤暴者。曰暴莫大于淮。越明年春作城之外。隄高三丈三尺。則泗城之藉於護隄者久矣。隄高三丈三尺。則水之高可知矣。而歲久浸廢。前功盡毀。萬曆四五年間。巡

按御史見任刑部侍郎邵陞築隄爲護。甃石爲堅。泗民恃以爲安者十五年矣。至今名其隄爲邵公隄。而風雨淋漓。車馬蹂躪。內土不免傾圮。臣於受事之初。躬往視之。誠慮其土去而石無所附也。遂以爲請。隨該工部覆奉欽依。漕撫侍郎舒應龍多方搜括。鳩工庀材。始克有濟。然該地方大小諸臣。拮据鞅掌。畚鍤間者。歲有二月。而後告成。其勤勞亦有不可泯者。然係人臣分內之事。何敢過爲干請。除佐幕義民等官。勞勩未多。臣等量行獎賞。舊縣巡檢張謨。酣飲廢事。徑行戒飭。不敢瀆陳外。如潁州兵備道副使王之猶。風猶峻潔。功令嚴明。勘覈務極其精詳。而工作無虛飾之弊。稽查不遺于絲粟。而錢糧無冒破之奸。已經臣於年終例薦。仍應咨部紀錄者也。如鳳陽府知府李驥。推官蓋國士。泗州知州汪一右。以上三員。志存捍患。念切急公。綜理密而縮費。大哀原額。調派均而撫循。尤所留心。允宜優獎。仍咨吏部紀錄者也。泗州同知馬尙綱。泗州衛指揮王畿。泗州吏目李元嗣。泗州衛鎮撫王有功。千戶陶承祖。路由正。盱眙縣典史曹自高。以上七員。殫力驅馳。勞瘁不辭于寒暑。悉心催督。勤劬無間于始終。所當量獎。併行紀錄者也。餘剩銀一千三十兩六錢九分二釐零。內將草灣銀四百四十六兩四錢四分七釐二毫。仍歸淮庫聽候修河支用。其餘無礙銀五百八十四兩二錢四分零。聽候漕撫衙門作正支銷。除將支用過工料項款銀數造冊奏繳外。伏望敕下該部。再加查議。如果臣等所言非謬。

覆請明旨。行臣等遵奉施行。應獎官員。容行該道。動支該府州無礙銀兩。分別等第給散。謹題請旨。奉聖旨。工部知道。該工部覆奉聖旨。是這各官紀錄獎戒等項。俱依擬。

### 議創石隄疏

臣潘季馴謹題。爲議創石隄。以垂永賴事。據夏鎮分司工部都水司主事余繼善呈稱。本職奉本院劄付內開。准工部咨。該本院題奉欽依。自珠梅閘起。至鎮口閘止。併支廟塔山一帶。應修守工程。專責本職管理。隨查得先蒙本院爲酌議漕隄。以圖經久事。仰職照牌事理。即便查議。近修漕河一帶。緯道橋梁。運艘過日。黍果可恃。就便一意修整堅固。以垂永久。如悉用土隄爲便。要見前被衝損。今作何法。能禦衝油之患。取土作何裝運。物料錢糧。作何出辦。逐一虛心酌議。務求確當。呈詳施行。如該司別有良策。不妨從長計議。以憑酌議具題。毋得含糊兩可。以致後艱。蒙此。本職俯思職掌。既已分土。從此一有失誤。皆職之責也。豈容他諉。即將所轄上下河道。與今酌議事宜。細加檢點。看得本管河渠。鎮口當清黃交接之處。常有倒灌淤塞之虞。本職請加鎮口古洪閘石。以峻隄防。仍建河口木閘一座。以便桃澗。東築戴家山橫隄。使外水不得漫入。西築支廟隄。令濁河不得越過。牛角灣門戶。關鎖甚密。兩翼相抱如環。明効亦可睹已。

惟運舟入漕之後。必有隄岸。繹挽。少有殘缺。便成阻隔。查得溜溝至姜家橋一帶。皆係一綫之隄。外濱微山。呂孟諸湖。內通西湖。風掀浪湧。內外加攻。實非金石。欲保常固難矣。每歲東修西補。僅可支吾一時。今春風雨更甚。損壞尤多。該職將全缺處所。採取木料。搭置橋梁。既可繹挽。而水勢通融。又可內洩。以增漕水之盛。其餘殘缺隄岸。亦皆修葺完固。但木橋易損。客土難堅。終非一勞永逸之計。查得微赤諸山。多產石塊。道里甚近。如多置船隻。載取山石。砌成兩面石隄。每三里留一水口丈餘。上面鋪橋通行。下縱水勢入運。既成金隄之固。又有濟漕之益。益隄而橋者也。永賴之計。無出於此。隨又查估得應用物料。自溜溝起至姜家橋止。計七千二百丈。兩面俱用石砌。高一丈一二尺不等。每丈用石一十二三層不等。內用底石襯護。大小闊狹不等。難計丈數。俱令本管夫匠。於微赤等山採運。合用石匠二百名。在於本管夫內選用。抹縫石灰。撥夫採柴燒用。隄心用土填築。議令回空糧船。并空載民船。上於戚城。下於境山高阜處所。稍帶差委職官。監發運送本隄交卸。俱未議錢糧外。惟有擎石杉椿。每丈用短椿六十根。共四十三萬二千根。每五根折長椿一根。共折八萬六千四百根。每根價銀一錢。共該銀八千六百四十兩。運石下椿。須用船隻。今議買民船八十隻。每隻價銀十兩。共該銀八百兩。二項共該銀九千四百四十兩。其餘零星小費。本職另行議處。今值錢糧匱乏之時。不敢別請。乞於原留餘

剩二升米銀。併歲修銀內支用。雖所費僅將萬金。而以數年幫修之費權之。亦略相當。如蒙允行。職當矢竭犬馬。力督管河同知趙炯。并各州縣掌印管河官。措辦興舉。此工告成。則本職所轄河道一百四十餘里。登之覆孟之固。無復有不舉之工。遺後日之慮者矣。等因。到臣。卷查先該臣牌行該司會查。近修內漕一帶橋梁。緯道。是否可久。又該臣題奉欽依。分任司道。畫地巡守。劄行本官去後。今據前因。爲照主事余繼善所轄地方。實係溝黃濱鄰交會之所。而二三年間。本官既竭心力。築隄設閘。防護頗周。似無慮矣。所據溜溝姜家橋一帶。緯路較之河防。雖有不同。而揆之利涉。亦當周備。今以一綫之隄。居諸湖之中。風浪衝刷。勢所不免。故隨修隨圮。旋壞旋築。蓋自設隄以來。即有然者。本官議將本隄兩邊用石鑲砌。每三里留一橋門。使內外之水通融。縈會並流出閘。則既免阻遏之虞。又無衝潰之患。且工費不過萬金。錢糧取之歲額。計無善於此矣。伏望敕下該部。再加查議。如果臣言可採。覆奉明旨。容臣督行主事余繼善。率同各掌印管河官。將各項料物器具。分投措辦。設法整砌。其應動銀兩。派撥官夫。及買船帶土一切事宜。悉照本官所議施行。未盡事宜。臨期再行斟酌。但道里頗遠。工作亦煩。矧非洗鍋待鑿之工。無妨次第興舉。惟在堅久可恃。不必刻立限程。工完之日。聽總理衙門覆覈明實。如果工程堅好。足垂永久。優叙奏請。以勵羣工。若虛應故事。定行參究。用過錢糧。造冊奏繳。漕渠幸甚。

臣愚幸甚。謹題請旨。奉聖旨。工部知道。該工部覆奉聖旨。是。

### 會勘徐城鎮口疏

臣潘季馴謹題。爲垂亡之人。憂思轉切。諱摘河上一二易惑浮言。乞恩俯賜勘議。以定久計。以免勞費事。據管理中河郎中沈修。夏鎮主事余繼善。淮揚海防兵備按察使張允濟。潁州兵備副使王之翕。徐州兵備副使陳文燧。曾呈蒙臣并漕運巡撫右侍郎周案。劄付俱准工部咨爲前事。并工科都給事中楊其休等題爲臨河要地。水漲可虞。乞敕勘議。以慰人心事。及蒙巡漕御史賈名儒案驗。奉都察院劄付同前事。備行職等。會同詳勘。妄見各疏內所稱加隄加城。以後黃水暴發。有無可以捍禦。遷城避患。士民意見有無。翕然相同。開隄分水。是否可免衝決。通湖洩水。是否可免停漲。此外有何長便之策。足爲河防久遠之利。務要虛心計處。毋得漫爲兩可之言。致誤大計。其鎮口閘座。若果別有善地。可以改建。亦不妨從實勘報。如以清黃交會之處。無往不淤。見在閘座去口尙近。易淤疏濬。仍應照舊。亦要明白聲說。以杜後議。各司道務須體勘詳確。會議妥當。具由通詳。以憑覆勘。會題施行等因。奉此。該職等關會勘議。并行淮安府管河同知趙炯。督同徐州掌印管河官逐一勘議去後。今據呈稱。查得徐城坐臨河濱。歲受黃



河之害其來遠矣。隆慶年間黃水暴漲，幾潰西門。先任同知馮鑲解衣囊土爲士民倡，力堵其門。萬曆初年議築護城隄，以爲捍禦。舊歲黃漲異常，兼以陰雨過多，以致徐城積水，無路洩出。城內軍民房舍，拆卸過半。州堦學宮盡皆沮洳。近蒙本道遍歷各處，相度形勢，勘得自護城隄涵洞起斜向東南，歷魁山至蘇伯湖西，勘至史家村陳家林晁夏二湖楊二莊，闕曠直抵宿州符籬集東小河止，計長一百六十二里。堪以開渠洩水，分布官夫挑成支河一道，隨開涵洞放水，勢若建瓴，而徐城積水數日之間，日見消落。今驗城濠水已洩四尺九寸三分，城水已洩三尺七寸九分。見今滔滔南流，居址街衢盡成亢爽。徐城已危再安，士民旣徙復還，但此河新開善後事宜，所當計處者有三：一築隄防以固保障，一議閘座以嚴啓閉，一加常夫以固防守。又勘得鎮口閘內係清水，外係黃流，平時清水外出，閘口自無淤阻。若黃水漲，則清弱黃高，濁流內灌，不免停淤。願今閘口去河止八十丈，疏濱易於爲力。今若別從改遷，求以免淤，則先年溜溝淤而改梁山，復改茶城，改張孤山，改古洪，又何以屢遷屢塞也。相應仍從鎮口爲便，但閘座旣已照舊，而善後應議之事亦有三：一復常夫以便挑濬，一嚴啓閉以防出入，一設專官以便彈壓。再照魁山支河旣通，徐城積水已洩，不惟目前可救沮洳，即千萬禩永恃此河以爲奠安之計，較比改河子房山下省費數萬金，遷城邱墟之上，省費又數倍。前者遷城改河之說，似可

免議等因。呈詳司道。該職等會議得救民者。變則必通。而治水者。行所無事。蓋天下之事。無全利亦無全害。而怠之則爲豫。蠱擾之則爲拂。經權利害之大小。而不怠不擾。則安民利國。自無難事。而衆見之。公獨見之。明均有不必泥者。國家定鼎燕冀。歲漕東南粳粟四百萬石。由徐入鎮口。達清濟。實京師。徐州固稱扼控衝襟。而轉運漕艘。必資黃河之水。黃水奔騰剽悍。排山襄陵。自昔患之。徐城初建。隔遠黃河。宋熙寧十年。河決澶淵。經遠城下。遂苦水患。元時移城廣運倉基。未幾水復衝齧。城不能保。我明復還舊地。萬曆初年。創築護隄。設減水閘。以洩伏水。始得安堵。爾因關陝久旱之餘。仍之積潦。內水難洩。兼之十七年。開吏放水灌入。十八年。雨雪異常。積水增漲。四隅軍民房舍。幾于沉窳。產蛙。士民紛紛異議。或謂河水冬春未消。地泉湧出。請從碭山縣戎家口建石壩。分黃河上流爲保城計。又欲改黃河子房山下出徐洪後。遠避城根。是謂河病則徐亦病。治河即所以治徐也。而城內積水。自昔已然。即改漕河。未必能救。遷城時久費巨。無救眉急。該徐州道陳副使遵奉河撫二院明文。勘議魁山以南。歷瑤家村。蕭縣楊二莊。宿遷闕疇地方。以達小河。綿亘一百六十二里。可挑支河。以洩城水。鳩集夫匠一萬餘名。疏鑿土石工程。至閏三月初三日。各工告竣。初四日。開放。勢若建瓴。浹洶之間。消洩殆盡。濠水洩出城根。城水洩出舊址。官舍民居。盡獲安堵。轉徙之民。復還故處。還定安集。今昔殊觀。不惟遷城

改河之說無容別議。而有此支河。則有此州治。將爲永賴之利矣。但此河初開。尙覺草創。則善後長策。誠有如本官所議者。至於鎮口閘爲漕艘入閘咽喉。初從溜溝。溜溝淤改之爲梁山。梁山淤改之爲茶城。茶城淤改之爲張孤山。張孤山淤改之爲古洪。萬曆十五年古洪復淤。回空阻誤。蒙皇上特遣工科常都給事中勘議。增設鎮口一閘。亦知黃強清弱。理勢之常。清黃相會。無處不淤。無論溜溝梁山茶城張孤山古洪爲濁河初會。勢不免於淤墊。而邳州之直河宿遷之小河。乃黃河下流。亦且灌阻。則舍古洪而他徙。由之古洪也。且鎮口去河八十丈。近而易濬。轉運數年。諸艘通利。惟十八年伏水發於五月十三。比昔太早。經冬雨雪。遂成冰凍。旅使船隻。稍覺濡滯。而喙啄爭鳴。浮議復起。今欲議長策。擇善地。職等謂資黃濟漕。而欲黃不爲害。即神禹復生。未有完策。祇緣官夫不能疏導。啓閉不遵法禁。則十五年八九月間。阻船數千。幾致意外。此則可爲隱憂。而漕渠有必致之水勢。治河無盡省之人功。酌時宜。申舊法。如本官與該州所議諸事。毅然行之。即行所無事。而漕渠永利。固非敢持獨見而自用也。謹用開款列陳。伏乞再加裁酌。題復遵行。即兩地蒙安。勞費且省。國計民生。胥有恃賴矣。等因。呈詳到臣。案照先准工部咨。該臣題前事。謂鎮口清更交接。無往不淤。另尋別道。隨地皆然。徐城積水。止因義民盧泰放水灌入。又兼去歲雨雪甚多。以致難消。乞行勘議。以息浮言。以省勞費。又該工科都給事

中楊其休等題爲臨河要地。水漲可虞。乞救勸議。以慰人心事。謂徐城河水不落。則地下之浸灌必深。河勢日高。則城中之宣洩爲難。欲開月河以分水勢。使徐無衝決之患。通蘇伯湖以導積水。使徐無停漲之虞。要行會勘。從長計議等因。俱經該部覆奉。聖旨是着河漕等衙門勘議停當。具奏。欽此。移咨臣等。隨經備行各司道。逐一虛心會勘。去後。今據前因。該臣會同漕撫侍郎周空。巡漕御史賈名儒等。將徐城新開支河。併鎮口閘等處。逐一躬親閱視。委與該司道所呈無異。爲照徐城外河。原係山東汶泗諸泉。即今鎮口閘所出之水也。涓涓之流。泉於徐城之地多矣。自宋熙寧十年。黃河南徙。曾淮其勢始高。徐城遂有水患。據宋臣蘇軾入市巷閭井之言。則彼時河水委入徐城。業再遷矣。延至萬曆初年。原任徐州道副使見任南京兵部尙書舒應龍。勦筴護砌石隄。而黃河始與徐城隔絕。了無干涉矣。止因萬曆十七年。義民盧泰啓閘放水內灌。而十八年雨雪連綿。無處開洩。遂至盈溢。議論紛然。或主遷城。或主改河。臣是以有請勘之疏。而工科都給事中楊其休等亦具疏催勘。今新開支河。即科疏所稱蘇伯湖地方。而此渠一開。城水盡洩。內渠曾無潛滋暗長。外河亦無停蓄不流。則城水之無阻於外河。可想見矣。且故河係祖宗運渠。固難輕改。而河不兩行。徒滋勞費。若遷城本以避水。今徐城安堵如故。又似可免議遷矣。至於鎮口閘外併清黃交接之處。平時清水外出。其流甚順。一遇黃水暴漲。不

免倒灌成淤。先年溜溝改梁山。又改而爲茶城。爲張孤山。爲古洪。竟不能免。如必欲爲快意。可喜之事。須得清黃不會之處。可也。而運艘全資黃水。豈能以不會哉。勘工都給事中常居敬所云。無往而不會黃。則無往而不淤墊。誠爲不易之論也。然鎮口去河止八十丈。淤墊不多。挑濬亦易。隨濬隨進。人力可施。糧運無阻。部疏所稱清黃交會之處。無往不淤。見在閘座。去口尙近。易於疏濬。仍應照舊。科疏所稱鎮口乃清濁交流之會。黃水一發。倒灌入漕。而河遂淤。黃強清弱。隨通隨塞。無適非是。已爲確見。臣等又何敢爲無益之紛更哉。伏望敕下該部。再加詳議。覆奉明旨。容臣等遵奉施行。其該司道款列事宜。臣等覆加參酌。開坐于後。恭候聖明裁奪。臣等無任激切屏營之至。爲此謹題請旨。

計開

一 甃石隄以固保障。照得新開支河。去城五里。卽爲魁山石渠。逼臨河濱。約有一百餘丈。已經剏築土隄防護。但恐客土未堅。暴漲易塌。濁流內灌。上下盈溢。不惟徐城有倒注之虞。而新渠亦難免淤墊之患矣。合將前隄用石包砌。以爲一勞永逸之計。工費銀兩。應於城隄銀內動支。伏候聖裁。

一 建閘座以便啟閉。照得州城東南護隄。原設涵洞一座。見今隄開洞啓。城水已洩。基址街

道並成亢爽。則城內之水固藉此口南注。而濱河居民。要從此河轉輸倉糧。搬運貨物。避黃河之風濤。省舟車之顧賃。不願填塞。其情亦常俯從。但閘座不設。啟閉無時。有如黃水暴漲。潰隄內灌。城中之民。未可安枕而臥也。合將東門減水舊閘。量添工費。移建本處。請添閘官一員。并乞欽定名目。以垂永久。再撥新募人夫十名。以司啟閉。如遇黃漲。鍵關固守。消落即行開放。費用不多。而利賴無窮矣。伏候聖裁。

一設長夫以備修守。照得魁山支河自徐州至小河。延長一百六十二里。原係沙土新開。日夜經流。未免坍塌。且陳家林迤北土隄未堅。蘇伯湖一帶伏秋黃水可慮。合照邳雖事例。添設隄夫二百五十名。除見在遊夫一百名外。應增一百五十名。即於都事胡傅所領二升米銀募夫內撥發。專管修守本隄。并護城隄。仍每五里建舖一座。以便各夫棲止。應用料價。於城隄銀內動支。仍責成鎮口總管官兼攝其事。庶緩急有濟。而近年失守灌城之事。當不再蹈覆轍矣。伏候聖裁。

一改隄夫以專疏濬。照得鎮口閘外。即爲黃河。黃濁倒灌。則必淤墊。全藉挑濬通行。而糧船體製重厚。往來多挾私貨。非併力揜輓。豈能利涉。先該工部題覆。勘河都給事中常居敬條議。將徐呂二洪人夫。摘撥六百三十三名。專司鎮口諸閘。嗣因年歉稅少。工食不敷。裁減二

百三十三名。止存四百名。分派前閘拽溜。其工銀改支夏鎮湖租。非不稱善。而糧運之時。苦不足用。查得徐州上河判官分管該州一帶西隄。額夫三百二十九名。原屬中河管轄。而西隄專爲防護內漕。應屬夏鎮分司。事體方便。合將前縷隄并夫。改屬夏鎮分司管理。再於邵事胡傅所領募夫內調撥二百名夏鎮分司。再於各閘壩裏撥七十一名。共一千名。并三閘夫六十名。俱責上河官管領。悉聽夏鎮總管官調度。專令住守本口。但有灌淤。併力疏濬。運艘入口。分投扯拽。運完之日。即行幫築西隄。庶糧運無阻。而河官亦免推諉矣。伏候聖裁。

一信法令以防淤阻。先該總河衙門題將鎮口比照淮安閘規。嚴禁啟閉。該部覆議。凡遇黃河暴漲。即便閉閘。一應官民船隻俱遵閘規放行。敢有阻撓。拿問參奏。至於鮮貢諸船。如遇黃水盛發。亦令暫候。刻石金書。昭如星日。而每歲伏秋閉閘避黃。往來船隻公然違背閘例。閘吏理阻。備受荼毒。甚至有斬關而出者矣。頻起頻淤。日無寧晷。而回空糧船。經月守候。有誤新運。誤事不小。合再申飭。今後除進貢龍袍鮮品船隻。嚴催五月以前入閘外。其餘棕藤架木與使客等船。但遇黃漲。閉閘守候。外水消落。啟板通行。若王程迫促。不能緩待者。聽該州拘留閘口內外泊船。互相倒換。敢有勢要抗違法禁。及家人船頭攬裝違禁私貨。夾帶民船。搶關射利者。聽管河官呈報總河衙門。照例參拿重治。庶法例森嚴。而閘口不致當淤矣。

伏候聖裁。

一添設職官以便彈壓。照得鎮口首閘清黃交會。灌淤之患。必不能免。而督夫挑濬。派撥捧輓。阻遏勢要。必得職事稍重官員。方可專責成而便駕馭也。先該都給事中常居敬題請淮安府管河同知移住境山。誠於閘務有裨。但靈雖邳宿河防最爲險要。一官豈能遙制。故不得已仍歸邳州舊署。而判官職微權輕。無可托重。勢要經臨。則吞聲啟閘。黃水內灌。則束手無措。合無添設府運專官一員。駐劄境山地方。將珠梅閘起至鎮口閘外一帶河道。併徐州護隄及新開支河防濬事宜。悉付本官管理。其自徐州迤南。并豐滂沛河道。仍歸原設管河同知。則地分而幹辦克濟。任專而責成自易矣。再照設官不難。而得人爲難。要害之區。似非練習有素者。鮮不僨事。查得見今添設徐邳管河帶銜山東都事胡傅。徐州管糧判官蔣繼祖。才力俱堪。是任。蔣繼祖履任未期。遽難轉擢。胡傅歷官河上。先後已逾九年。累經保薦。先該河漕衙門會請加銜管理邳州河務。因註選已定。未經推補。合無即將本官加陞職銜。管理前項地方。隄閘事務。上河判官聽其調度。則付托得人。而河防有賴矣。伏候聖裁。奉聖旨。工部知道。



工部覆前疏

題爲垂亡之人憂思轉切謹摘河上一二易惑浮言乞恩俯賜勘議以定久計以免勞費事該本部題都水清吏司案呈奉本部送工科抄出總理河道兼理軍務右都御史潘季馴總督漕運提督軍務右侍郎周寀巡漕御史賈名儒題同前事各等因俱奉聖旨工部知道欽此欽遵抄出到部送司案查本年三月內該總理河道右都御史潘季馴題前事又該工科都給事中楊其休等題爲臨河要地水漲可虞乞敕勘議以慰人心事各題議勘改鎮口閘遷徐州城避水患緣由等因該本部覆奉聖旨是着河漕等衙門勘議停當具奏欽此備行河漕等衙門欽遵勘議去後今該前因案呈到部看得治河一如治虜防口甚於防川自昨夏黃河非時驟漲客冬徐城積水未消或議當改河以全城或議當遷城以避河或議當改建鎮口一閘以免黃水倒灌衆論紛紜糜所決策臣等亦知事體重大遽難輕議特以運道民命所關苟有裨於禦災捍患即與大役動大衆自不當以勞費爲解故因右都御史潘季馴都給事中楊其休等先後條陳覆請會勘無非欲廣集衆思確求至當以息訛言以定久計今該總河總漕二臣及巡漕御史會題前因大率謂魁山支河旣開城水盡洩改河遷城無容復議鎮口閘去黃河甚近

即有倒灌。易於挑濬。仍應照舊。并將河閘善後事宜。開款上請勘議。明的衆論僉同。既以省目前之勞費。又可以破一時之羣疑。相應依擬。內除添設管河府佐一款。徑咨吏部議覆外。謹將整石隄等五事。酌議覆請。恭候命下。容臣等移咨河漕部院及咨都察院轉行巡漕御史督率司道等官。將一應善後事宜。查照覆議。着實遵行。仍咨總河大臣。此外如有未盡事體。不妨及時條議上聞。次第修舉。務使河防州治。可永恃以無虞。道路傳言。不更興於異日。庶幾國計民生。咸有攸賴等因。奉聖旨。依議行。

#### 計開

一 整石隄以固保障。前件看得徐州新開支河。惟魁山一帶。最爲緊要。其隄岸雖經用土。剏築。但本隄逼臨黃河。誠恐客土未堅。暴漲易塌。濁流內灌。不惟徐城有倒注之虞。而新渠亦難免淤墊之患。合依所議行。令用石包砌。一應工費。俱於城隄銀內動支。工完將用過數目造冊報部查考。伏候聖裁。

一 建閘座以便啓閉。前件看得徐城東南護隄。原設涵洞一座。目今隄開洞啓。城水已洩。而濱河居民。欲從此口轉輸搬運。不願填塞。議要就此開閘一座。時其啓閉。以防黃水內灌。其石料即將東門減水舊閘量添工費移建本口。仍撥新募人夫十名常川看守。以司啓閉。

既係民情所願，相應依擬。其閘官應否添設，并欽定閘名，俱候工完再加詳議，移咨前來。另行題請，伏候聖裁。

一設長夫以備修守。前件看得魁山支河，延袤一百六十餘里，原係沙土新開易淤。且陳家林迤北土隄未堅，蘇伯湖一帶伏秋黃水可慮。其本隄及護城隄，委應撥夫修守。合依所議，照邳睢事例，添設隄夫二百五十名。除見在遊夫一百名外，應增一百五十名。於都事胡傅輕齋二升米銀內，雇募撥發應用。仍每五里建舖一座，以便各夫棲止。一應工料價銀，俱於城隄銀內支用。備行夏鎮主事總管，事完將用過銀兩數目報部查考。伏候聖裁。

一改隄夫以專疏濬。前件看得鎮口閘外，即係黃河。每遇黃水倒灌，勢必墊淤。全資挑濬，兼以糧艘體重貨多，必藉撻挽。先該本部題覆，勘河都給事中常居敬疏，將徐呂二洪人夫責撥六百三十三名，以供本閘各項役使。後因工食不敷，裁減二百三十三名，止存四百名。分派前閘拽溜，遇有修築疏濬之事，動致缺人。前隄夫役，委應增設。合依所議，將徐州上河判官分管該州一帶西隄原屬中河郎中統轄者，改屬夏鎮分司管轄。即將西隄原設額夫三百二十九名，再於都事胡傅所領夫內撥二百名，各開壩稟撥七十一名，共足一千名。并三閘夫六十名，俱責上河判官管理。悉聽夏鎮分司調度。專令住守本口，遇有灌淤，併力疏

濬運艘入口分投扯拽糧運完後即行幫築西隄庶事體不致互相推諉夫役不必另增工食一更置之間費省事集而運道有賴矣伏候聖裁

一信法令以防淤阻前件看得鎮口閘係清黃交接之處啓閉尤當以時閘禁不嚴則將有黃水灌入運道淤塞之患先於萬曆十六年閏六月內該總理河道右都御史潘季馴題稱茶城三閘要比照淮安閘禁事例將題准明旨刻石金書堅立茶城之上該本部覆奉欽依備行欽遵去後緣時久弊生人情玩愒法禁廢弛委當再行申飭如龍袍貢鮮船隻照例于五月以前入閘外其餘棕藤架木官民船隻倘遇黃水盛發通候消落啓板放行其王程迫促不容緩待者許令地方官撥船搬剝如有官豪勢要及家人船頭攬裝私貨夾帶民船違禁射利者許管河官指名揭報總河衙門查照原題從重參提究治伏候聖裁

### 報消泗水疏

臣潘季馴謹題爲淮水已消流言未息謹將地方官節報水勢據實奏聞仰慰聖衷事臣於本年十月間據泗州知州汪一右稟稱淮水自九月以後日消一二寸不等見今共消四尺有餘續據該州申稱知州汪一右親督水手候大林內外打量水平淮水除前報外至十一月二十

八日止。又消過一尺五寸。共消過五尺五寸。其城內積水。車退八寸五分。及景外河水面。尙高城內水面二尺餘。圍隄自鑿東至水草廟。又禹王廟至西門二處。隄根露出三四尺不等。其城外濠水量得香花門至西門比淮水高六寸。又東南北三門比淮水高尺餘。見俱挖隄出放。已洩過四五寸。若濠水洩平。內水易於車戽。擬合申報。又據潁州兵備副使王之猶揭稱。浮言搖亂河計。職不勝驚異。夫淮河伏秋則漲。冬深則涸。其來非一日矣。獨是今歲霖雨連綿。雖若較之往歲。苦水頗甚。然亦時候消長使然。三道會勘陵水。獨沱溝頗有水痕。若下馬橋尙去湖水五十餘步。下馬橋去陵殿尙二百餘步。則全無水跡。御塚高出二十餘丈。水何能侵及。無藉之輩。廼假此以聳動觀聽。直無人心等因。臣猶恐未的。又行據該州知州汪一右。申稱打量水平。淮水報後。又消過二寸。連前共五尺七寸。又看得祖陵下馬牌地面。高於水面五尺七寸。逐一丈量。明白擬合回報等因。到臣案照先該漕撫侍郎周宥等題爲州治積水。濼潦益甚。根本重地。居民墊溺。乞賜會勘兩處。以甦災困事。內稱本年淮水雖甚漲。止及下馬橋。去陵尙遠。而泗人困于水中。無計自免。動爲壽張之語。以聳觀聽等因。夫周宥之疏。正發于辭陵之時。目擊水勢甚真。而其言如此。則其意專在泗城之積雨。非爲祖陵也。今據該道與該州節報申文揭帖。是周宥等發疏之後。淮水日消。業已遠去下馬牌。而泗城護隄根外。已露有乾灘者矣。而玄宮

巍然在上。去下馬牌遠甚。苟非洪荒之世。淮水豈能濺及。何者。蓋由祖陵原是土岡。較泗州城高卑懸絕。故城中之水未洩。而城外之水已涸矣。今據該州申稱隄外河灘已露。而城水尙難開放。則其故在於城地之窪。而不在淮水之高矣。今聞泗州士民流言遍布。謂淮水至今尙浸祖陵。不情甚矣。又臣於十月二十七日據海防道按察使張允濟徐州道副使陳文燧潁州道副使王之猶等稟稱。職等會勘祖陵之時。泗州士人指沱溝水濱土堆爲三祖舊陵。臣答之曰。萬曆九年該州鄉官常三省曾以此語載之。揭中臣躬往閱視之。則見祖陵東南隅沱溝水通流之處。藁莽中土堆在焉。問之並無封號。視之原無封植。若指此爲三祖舊陵。則國初封樹玄宮巍然高峙于尋丈之上。而爲萬世臣民瞻仰者。豈有誤耶。且高皇帝御製碑文。昭如星日。並無有所謂舊陵者。亦豈有誤耶。衆皆相顧駭嘆。危詞激語。惟欲動人而不自知其淪于不臣甚矣。且伏秋之水無處不漲。冬春之水無處不消。此氣候之必然者。而泗人乃謂淮水至今未消。寧有是理哉。語有之。衆口燦金。積毀銷骨。臣不足惜。獨慮我皇上孝思純篤。上廬聖衷。故敢備將地方官開報水勢。據實奏聞。其會勘過緣由。已經具本會題。恭候該部覆奉明旨施行。無容再贅外。爲此謹具題奉聖旨。工部知道。

併勘河情疏

臣潘季馴謹題。爲衰庸歸骨有期。犬馬戀主尤切。謹以熟試河情。瀝血具陳。恭候聖明採擇事。臣自嘉靖四十四年至今。以河事君父者。凡四任矣。壯於斯。老於斯。朝於斯。暮於斯。或採之輿情。或得之目擊。或稽之已往。或驗之將來。水有性。拂之不可。河有防。弛之不可。地有定形。強之不可。治有正理。鑿之不可。故厭常者。每欲棄舊以更新。而臣則以爲祖宗二百餘年之故道。必不可失也。泥成說者。每欲支分以殺勢。而臣則以爲黃河之濁流。必不可分也。臣執此以治河者。前後一十二年矣。而不意去秋霖霖連月。河水滔天。物議遂騰。牢不可破。夫當伏秋暴漲之時。兩河並高。人言無足怪也。而寧知漲之必有消乎。以方漲之河。而律之旋消之後。不可也。人見其水盈及隄。輒謂隄可棄也。而寧知防潰則水泛。外洩則中乾。不數日而水落。岸出。河安如故。固隄所以存河乎。行者止見其漲。而不見其消。談者不聞其消。而惟聞其漲。一人言之。百人從而和之。若謂水之有漲無消。而冬春之河。猶然伏秋之河也。而不知其大有不侔者耳。倘觀其漲。復觀其消。則全河之形勢。皆在目中。自無臆度之說矣。臣已去矣。墓木拱矣。何敢以筆舌與人爭曲直哉。且議者原無怪臣之心。見者言其所見。聞者言其所聞。凡以爲國也。臣器局拘

變才識短淺。非兩河之故道。不敢循。非先哲之成規。不敢蹈。曾不能別輸一籌。以新天下之耳目。臣亦自憎其無當矣。而况於人乎。但慮天下之事。議論多者。成功或毀。興作侈者。工費自煩。支離勝者。正道必廢。有宋竭天下之財力。以事河。而國以大敵。卒之橫潰決裂。不可收拾者。職此故也。故敢備述人言之最易惑衆。最能病河者。逐一詳解于後。伏乞敕下工部。覆行勘河。工科右給事中張貞觀。逐一踏勘。廣詢博訪。如以臣言爲是。則當安常處順。毋事更張。如以臣言爲非。則當易轍改絃。勿循故態。務求畫一之論。以爲永賴之規。若築舍道傍。疑心信耳。今日之案墨未乾。明日之新議復起。無論衰病如臣。即壯猷任事。忠勤敏練如將來者。亦何所措手哉。故敢冒昧具陳。伏望我皇上俯垂鑒照。曲賜矜原。臣無任激切屏營之至。謹題請旨。

### 計開

一議者謂水勢宜殺。黃水暴漲。何不多濬支渠以殺之乎。臣曰此分合之說。正所當辯也。分流誠能殺勢。然可行於清水之河。非所行於黃河也。黃河斗水。沙居其六。以四升之水。載六升之沙。非極迅速湍急。則必淤阻。分則勢緩。勢緩則沙停。沙停則河飽。飽則奪河。河不兩行。自古記之。藉勢行沙。合之者乃所以殺之也。又謂水漲之時。暫開決口。以分其流。水落復塞。此言誠似有見。但塞決如升天之難。費亦不貲。臣於萬曆八年築有崔鎮。徐昇季太三義四



減水石壩於桃源縣遙隄中壩與地平。水浮則洩。此與開決之說無異。而水過石止。難於深刷。可無奪河之虞。水落歸漕。壩復如故。可免塞決之費。此外不須另開決矣。伏乞聖裁。

一議者謂舊河沙墊底高。不若另覓新河之爲得也。臣曰沙固易停。亦易刷。即一河之中。漕處則深。緩處則淺。水合沙刷。必無俱墊之理。此淺彼深。亦無妨運之事。人見伏秋水高。輒歸罪于沙墊。殊不知此水高于面。非沙高于底也。如使河底果爲沙墊。則冬春水落岸出之時。舟膠不能行矣。且去秋蘇松報報水溢入城七尺。湖廣報稱公安等處隄爲深淵。亦豈以沙墊底高而然乎。藉令因此而欲棄故道。別鑿新河。無論其無所也。即得便宜之地。而鑿之人。力能使闊百丈。以至二百丈。深二丈。以至三四丈。如故河乎。即使能之。將置黃河於何地乎。如不可置。則行之數年。新者舊矣。河何擇於新舊。舊則淤。新則不淤。非臣之所能解也。且禹之治水。九河曰疏。濟潔曰淪。汝漢曰決。淮泗曰排。傳者曰疏通也。淪亦疏通之意。排決皆去其壅塞也。蓋天地開闢之初。即有百川。四瀆原自朝宗于海。禹但去其壅塞。以復天地之故道耳。凡民知識不逮神禹遠甚。乃欲棄故從新乎。議者又謂徐邳非黃河之故道也。然獨非泗沂之故道乎。禹貢所謂導淮自桐栢。東會于泗沂。即此河也。志稱宋神宗十年。河大決于澶州。合南清河而會于淮。南清河者即泗沂也。行之六七百年。是亦黃河之故道也。伏乞聖

裁。

一議者謂賈讓有云。土之有川。猶人之有口也。治土而防其川。猶之兒啼而塞其口。故禹之治水以導。而今之治水以障。何也。臣曰。昔白圭逆水之性。以鄰爲壑。是謂之障。若順水之性。以隄防溢。則謂之防。河水盛漲之時。無隄則必傍溢。傍溢則必泛濫。而不循軌。豈能以海爲壑耶。故隄之者。欲其不溢。而循軌以入於海。正所以導之也。考之禹貢云。九澤旣陂。四海會同。傳曰。九州之澤。已有陂障。而無決潰。四海之水。無不會同。而各有所歸。則禹之導水。無嘗不以隄哉。議者又謂水愈高。則隄愈增。不將隄于天乎。臣則曰。若謂河水有長無消耶。亦豈以隄外即水耶。隄外爲灘。灘外爲河。平時水不及灘。隄若贅疣。伏秋異常之水。亦止丈許。始逾灘而及隄。然或三日。或五日。或七日。或旬日。即復歸落于漕。隄之高者。不過踰丈。何能隆之于天也。至如俯闕城廓之說。有目者所共睹。不必辯矣。伏乞聖裁。

一議者向謂昔年徐呂二洪。怪石鱗峒。上浮水面。湍激之聲。如雷如霆。舟觸之必敗。今皆無聲。得非沙掩其上而然乎。臣曰。二洪本體甚高。沙能掩之。是無徐州矣。徐州洪爲工部主事郭昇戴鯨陳穆先後剗鑿。志所謂翻舟等石。悉去無餘。又云盤踞橫突。隱見於波濤之間。激飛湍而鳴雷霆者。剗削殆盡。是也。呂梁洪爲工部主事陳洪範所鑿。先臣大學士徐階記中。

所稱獐利如劍戟之相向。虎豹獅象之相攫。犬牙交而蛇蚓蟠者。怪石盡去。舟行如出坦途。是也。自諸臣鑿平之後。往來更無覆溺之患。厥功甚大。蓋比時偶因黃河他決。二洪爲涸。天假之便。以成諸臣之功。而不知者遂謂洪爲沙掩耳。又有病其剗鑿之後。水不漱石。故不能刷沙則誤矣。夫水之激石止在水面。豈能刷及河底之沙。且自河南至雲梯關海口幾二千里。惟徐呂五十里內有此二洪。縱能刷沙。豈能刷及二千里耶。不以諸臣爲功。而以爲罪。冤哉乎其言之矣。伏乞聖裁。

一議者謂雲梯關海口沙塞。以致兩河停蓄不流。有之乎。臣曰。黃河自星宿海經崑崙山萬里而來。但從雲梯關出海。並無他處分洩。海口果塞。兩河豈有不停之理。但自春徂冬。自朝及暮。滔滔東下。迅溜湍激。何嘗有一息停蓄。如其停也。則水當有長無消矣。乃朝而長。暮而消。或今日長。明日消。消有多寡。有遲速。然必無長至旬日而不消者。而大分則伏秋長。多消少。冬春長。少消多。上源雨多則長。雨霽則消。此一定而不可易者。海口旣塞。則所消之水。何往耶。臣往歲嘗親至雲梯關閱視海口深濶。人言付之一笑。萬曆十九年十月。臣復行淮安府。同知趙垞。率同海州知州路暉。安東縣知縣楊日采。贛榆縣署印判官王守正。親往海口踏勘。回稱職於十月二十三日。督同各州縣掌印官及備倭陳指揮。總李大經等親履其

地。勘得雲梯關以下。自夾套至十一套。面闊三五七八里及十里不等。水深一丈五六尺及二三丈不等。滔滔迅駛。原無隘窄。至云對口有橫沙一段。在四十里之外。望之不見潮長。上可行舟。潮退尙深三四尺。人言自來如此。並無淤梗。及又查得各套俱不通海等因。在卷料想之語未足深聽。伏乞聖裁。

一議者謂黃高于徐。淮高于泗。可不爲之處乎。臣曰不能也。非不爲也。自河南開歸以至淮安之安東。其地皆卑于河。不獨徐泗爲然也。如黃而可卑。則湯遷于亳。仲丁遷囂。河賈甲遷相。祖乙遷耿。盤庚遷般。凡以避河也。而何其不憚煩如此也。淮而可卑。則宋景祐三年泗州張守不必築護城隄。三丈三尺以捍之矣。此載在志傳中可考也。如有能卑河以就地者。臣當其辜。何敢辭哉。以上數端言若有理。而聽之不覺其深信。事若可從。而行之必至於病河。臣身雖已去國。臣心猶在此河。故敢不避煩瑣。而復爲曉曉如此。亦自盡其犬馬之心耳。不敢必其見亮於人否也。伏乞聖裁。奉聖旨。工部知道。



運 航



力 水



洪 防



溉 灌



水 給

上海图书馆藏书



A541 212 0005 7377B

4.6-3

